

Բաբկեն Հ. Հարությունյան
ՀՀ ԳԱԱ թղթակից անդամ

ՊԵՏԱԿԱՆ ՄԱԿԱՐԴԱԿԻ ԲԱՐՉՐԱՑՎԱԾ ԿԵՂՃԱՐԱՐՈՒԹՅՈՒՆ

Ադրբեջանի նախագահի աշխատակազմի ղեկավար Ռ-ամիզ Մեհթիևի «Գորիս-2010. արսուրդի թատրոնի տարեշրջանը» գիտաքաղաքական աճաքարությունը*

2010թ. հոկտեմբերի 16-ին Գորիսում Միյուրքի հայկական լրատվամիջոցների ներկայացուցիչների առջև նախագահ Սերժ Սարգսյանի ելույթից հետո Ադրբեջանի նախագահի աշխատակազմի ղեկավար, ակադեմիկոս Ռ-ամիզ Մեհթիևի անունից այդ երկրի էլեկտրոնային լրատվամիջոցներում (Trend.az, Day.az և այլն) հոկտեմբերի 29-ին տեղադրվեց և ապա առանձին գրքույկի վերածվեց «Գորիս-2010. արսուրդի թատրոնի տարեշրջանը՝» վերնագիրը կրող մի ծավալուն «տեղեկանք», որը փաստորեն ՀՀ նախագահի առաջադրած պատմագիտական փաստարկների «պաշտոնական պատասխանն» է: Այն սկսվում է քաղաքական մեղադրանքներով և ավարտվում բավականին ընդարձակ պատմագիտական շարադրանքով, ինչն անկասկած, Հայաստանի ու հայ ժողովրդի պատմության շուրջ ադրբեջանական նախորդ կեղծարարությունների խորացված փարբերակն է:

1. Հիշողության կորստի ախտանշաններ

Հատկանշական է, որ թեև մինչև վերջերս Հայաստանի Հանրապետության հաջորդական ղեկավարները խուսափել են պատմագիտական հարցերի շուրջ պաշտոնական Բաբվի հարցադրումներին պատասխանելու գայթակհությունից, իսկ հայր և որդի Ալիևներն իրենց հրապարակային ելույթներում բազմիցս հրահանգներ են իջեցրել սեփական երկրի պատմաբաններին՝ ստեղծելու աշխատություններ, «ապացուցելու համար», որ Ադրբեջանի տարածք են եղել ոչ միայն Լեռնային Ղարաբաղը, այլև ներկայիս Հայաստանի Հանրապետության հողերը, այդ ամենին մասնակից, մասնագիտությամբ փիլիսոփա, Ռ-ամիզ Մեհթիևը² իր «Գորիս-2010. արսուրդի թատրոնի տարեշրջանը» հրապարակման

* Դողվածն ընդունվել է տպագրության 12.12.2010:

1 Տե՛ս Рамиз Мехтиев, Горис – 2010: сезон театра абсурда, <http://www.Trend.az>, 29.10.2010.

2 Թեև սույն հրապարակման վերևում դրված է Ռ-ամիզ Մեհթիևի ստորագրությունը, սակայն, ամենայն հավանականությամբ, այն ստեղծվել է մի ինչ-որ խմբի կողմից և Internet է ներմուծվել վերջինիս

հենց առաջին իսկ նախադասություններից իրականությունը շրջել է գլխիվայր:

Նա պնդում է, թե իբր՝ «Սփյուռքից հրավիրելով լրագրողների, Մերժ Սարգսյանը հնարավորությունից օգտվելու և տարածաշրջանում տեղի ունեցող գործընթացների օբյեկտիվ և անկողմնակալ վերլուծության կոչ անելու փոխարեն, **յուրահատուկ «նախագահական» հրաման է տվել. «անճանաչելիորեն խեղաթյուրել պատմական փաստերը, իր կողմից հրապարակված եղանակով վերախմբագրել պատմությունը, անտեսել գիտական սկզբնաղբյուրները, նրանց փոխարեն հենվել իր կողմից առաջարկված առասպելների և հորինվածքների վրա: Առողջ ակադեմիական միջավայրում պետության ղեկավարը սովորաբար չի միջամտում գիտահետազոտական գործընթացին, այլ գիտնականների համար պայմաններ է ստեղծում հրատապ նշանակություն ունեցող հիմնահարցերի ուսումնասիրության, մասնագիտական, համակողմանի, անկողմնակալ և որ ամենևին էլ երկրորդական չէ՝ առկա սկզբնաղբյուրների ողջ հանրագումարի քննադատական վերլուծության, նրանց արդյունքների հետագա հրապարակման և լայն քննարկման համար՝ առանց նրանց ընդհանուր զանգվածից մի մասն առանձնացնելու և մյուսներն անտեսելու»³:**

Հարց է առաջանում՝ իրականում ո՞ւմ է ուղղված այս ծավալուն «ակադեմիական քարոզը», երբ, ինչպես արդեն նշեցինք, Հայաստանի ղեկավարը գործիսյան իր ելույթում **առաջին անգամ է** հրապարակավ անդրադարձել պատմագիտական հարցերին: Ուստի՝ երբ ակադեմիկոսի կոչում ունեցող անձը պնդում է, որ Հայաստանի Հանրապետության նախագահը հրաման է տվել «վերախմբագրել պատմությունը», մոռանում է, որ գիտնականի անաչառության առաջին պայմանը նման «հրամանի» տեքստի հրապարակումն է, ինչը ստիպված ենք անել մենք՝ իր փոխարեն: Ահա այդ «հոկտեմբերի 16-ի հրամանը»՝ ուղղված Սփյուռքի լրատվամիջոցների ներկայացուցիչներին. «**Ո՛չ գունագարդել, ո՛չ սևացնել, պարզապես ակտիվ ներկայացնել ճշմարտությունը. սա է խնդիրը, որը մենք միասին պետք է լուծենք**»⁴:

Ավելին՝ երբ երկար տարիներ Ադրբեջանի նախագահի աշխատակազմը ղեկավարած անձնավորությունը հիշողության կորստի ակնհայտ ախտանշաններ է դրսևորում, ստիպված ենք կրկնել, որ ի տարբերություն Հայաստանի Հանրապետության նախագահի, նրա հաջորդական երկու ղեկավարները՝ հայր և որդի Ալիևները, արդեն շուրջ մեկ տասնամյակ հրապարակավ հանդես են գալիս ոչ թե տարածաշրջանի պատմությունը անաչառ կերպով ուսումնասիրելու, այլ ներկայիս Հայաստանի Հանրապետության տարածքների՝ «Ադրբեջանի հողեր» լինելն «ապացուցող» աշխատություններ գրելու (Հեյդար Ալիև, 1999 թ.), Լեռնային Ղարաբաղը «հնագույն ադրբեջանական տարածքներ» հռչակելու մասին (Իլիամ Ալիև, Բարդա, 13 սեպտեմբերի, 2004 թ.)՝ իրենց երկրի պատմաբաններին ուղղվող հրապարակային կոչերով:

Ուրեմն՝ մեր երկու պետություններից որի՞ հաջորդական ղեկավարներն են

ստորագրությամբ: Չլինելով պատմաբան, չտիրապետելով հայերենին, Ադրբեջանի նախագահի աշխատակազմի ղեկավարը դժվար թե կարողանար 13 օրվա ընթացքում ուսումնասիրել այն հայկական աղբյուրներն ու գրականությունը, որոնք առկա են «Գորիս-2010. աքսուրդի թատրոնի տարեշրջանը» աշխատության մեջ: Բայց քանի որ աշխատությունը լույս է տեսել ակադեմիկոս Ռ. Սեիթիևի անունից, մեր պատասխանը նույնպես հասցեագրել ենք նրան:

3 Տե՛ս <http://www.Trend.az>, 29.10.2010, c 2.

4 Տե՛ս <http://www.Lragir.am> 18.10.2010.

տարիներ շարունակ «միջամտել գիտահետազոտական գործընթացին» և ուղղակի ցուցմունքներ տվել սեփական երկրի պատմաբաններին: Եթե Հայաստանի Հանրապետություն, ապա Ռ. Մեիֆիևը պետք է, որ մատնանշի 2010 թ. հոկտեմբերի 16-ին նախորդած նման մեկ օրինակ, իսկ եթե Ադրբեջանի, ապա մեր պատասխանը կարդալուց հետո նա պարտավոր է կամ **հերքել**, կամ էլ **վերհիշել** իր երկու անմիջական ղեկավարների վերը նշված և բազմաթիվ այլ «պատմագիտական հրամանագրերն» ու դրանց ուղեկցած գավեշտական վերլուծությունները:

Մեր կողմից հույս ենք հայտնում, որ սեփական ղեկավարների խոսքերը **հերքելու** պարագայում Ռ. Մեիֆիևին չեն ազատի աշխատանքից, իսկ **վերհիշելու** պարագայում, որն ավելի հավանական է՝ նկատի ունենալով Ադրբեջանի հաջորդական նախագահների ելույթների հրապարակային բնույթը, կվերականգնվի նաև Ադրբեջանի նախագահի աշխատակազմի ղեկավարի **հիշողությունը**:

Հիշողության կորուստը հաղթահարելու պարագայում Ռ. Մեիֆիևը թերևս կհրաժարվի նաև Հայաստանի նախագահի լեգիտիմությունը կասկածի տակ դնելու գայթակղությունից, որովհետև, ի տարբերություն Հայաստանի Հանրապետության, Ադրբեջանում նախագահական իշխանությունը փոխանցվում է հորից որդուն, ուստի Ռ. Մեիֆիևը՝ իբրև ժառանգական **միապետի** աշխատակազմի ղեկավար, կարծում ենք, բարոյական իրավունք չունի արտասանելու «լեգիտիմություն» հասկացությունը:

Սեփական հիշողությունը վերականգնելու և հայկական կողմին Խոջալուի դեպքերի վերաբերյալ անհեթեթ մեղադրանքներ չներկայացնելու համար Ռ. Մեիֆիևին առաջարկում ենք գոնե մեկ անգամ կարդալ 2003-ին ռուսերենով լույս տեսած Հայկ Գեմոյանի աշխատությունը⁵:

Ռ. Մեիֆիևի հիշողության կորստի փաստն ակնհայտ է դառնում նաև Հայաստանի Հանրապետության նախագահին վերագրվող՝ միջազգային իրավունքի մեջ ազգերի ինքնորոշման հիմնախնդրի «կամայական մեկնաբանության» մասին մեղադրանքի հետ ծանոթանալիս: Հարց է առաջանում՝ եթե միջնորդ երկրները պնդում են, որ Ղարաբաղյան հակամարտությունը պետք է կարգավորվի ազգերի ինքնորոշման, տարածքային ամբողջականության և ուժի չկիրառման սկզբունքների համադրումով և Աստանայում՝ ԵԱՀԿ վերջին գագաթաժողովում, ԱՄՆ պետքարտուղարի բերանով նախազգուշացնում են, որ չի կարելի դրանցից առանձնացնել որևէ մեկը, իսկ Մադրիդյան սկզբունքները նախատեսում են Ղարաբաղի ազգաբնակչության իրավաբանորեն պարտավորեցնող ազատ կամարտահայտման իրավունքը, ապա ո՞րն է այստեղ ազգերի ինքնորոշման իրավունքի «կամայական մեկնաբանությունը»: Որպես գիտնական, կարծում են, որ «կամայական մեկնաբանությունը» միջազգային հանրության կողմից ճանաչվող՝ ԼՂՀ ժողովրդի ազատ կամարտահայտման իրավունքի անտեսումն է Ադրբեջանի կողմից:

Հայտնի է, որ ամեն մի դարաշրջանում հզոր տերությունները միջազգային իրավունքի շղարշի տակ փորձում են հավերժացնել ստեղծված քաղաքական վիճակը, սակայն ինքնորոշման իրավունքը, գոնե վերջին դարերից, դարձել է հասարակական կյանքի անկապտելի մասը: Եթե չլիներ այդ, ապա Բանգլադեշի ստեղծումը և անջատումը Պակիստանից պետք է համարվեր միջազգային

5 Տե՛ս Айк Демоян, Ходжалинское дело. особая папка, Ереван, 2003.

իրավունքին հակասող երևույթ: Բայց դա բոլորովին էլ այդպես չէ: Ավելին՝ պետք է հակաիրավական ակտ դիտվեր մաս ԽՍՀՄ-ի կամ Հարավսլավիայի փլուզումը, Կոստովոյի անկախացումը: Բայց ո՛չ, միջազգային հանրությունը հանգիստ ընդունել է այդ փոփոխությունները և վավերացրել դրանք: Եվ այդ ամենի փոխարեն՝ Հելսինկիի եզրափակիչ ակտի պաշտպանությանն ապավինող հեղինակն ինչու՞ չի ընդունում Ադրբեջանի անկախության անիրավական լինելը: Չէ՞ որ 1975 թվին Ադրբեջանը միջազգային իրավունքի սուբյեկտ չէր, և Հելսինկիի ակտը ճանաչել է ԽՍՀՄ-ի սահմանները:

ՀՀ նախագահը Սփյուռքի հայ լրագրողներին կոչ արեց ներկայացնել ճշմարիտ և օբյեկտիվ պատմությունն Արցախի վերաբերյալ և այն հասցնել համաշխարհային հանրությանը: Այո՛, պետք չէ ոչինչ գունագարդել և դա, իհարկե, միանգամայն ճիշտ խորհուրդ է: Այն վերաբերում է ոչ միայն հայ հեղինակներին, այլև օտարազգի ակադեմիկոսներին, որովհետև գիտնականները երևույթները քննում են նրանց պատճառահետևանքային կապի մեջ: Ուստի, երբ Ռ. Մեհրիկը սկսում է խոսել ավերված և հրկիզված Շուշիի մասին, որին այդ վիճակի մեջ են դրել «հայ մարդասպանները», մոռանում է, որ մինչխորհրդային շրջանում Շուշին հանդիսանում էր Անդրկովկասի չորրորդ քաղաքը՝ հայկական գերակշիռ բնակչությամբ: Իսկ ովքե՞ր կոտորեցին Շուշիի հայ բնակչության մեծ մասին և հրկիզեցին հայկական թաղամասերը 1920 թ. մարտին, հայե՞րը, թե՞ ադրբեջանցիները: Մինչդեռ, 1992 թ. մայիսին, երբ հայերն ազատագրեցին Շուշին, այնտեղ խաղաղ ադրբեջանական բնակչություն չկար: Ուրեմն՝ ովքե՞ր են մարդասպանները՝ դժվար չէ եզրակացնել:

Ավելին, հայտնի է նաև, որ Կավբյուրոյի 1921 թ. հուլիսի 5-ի որոշմամբ Լեռնային Ղարաբաղին տրվելու էր լայն ինքնավարություն՝ Շուշի կենտրոնով: Հարց է առաջանում՝ իսկ ինչու՞ դա չիրագործվեց: Պատասխանը պարզ է. ադրբեջանական իշխանությունները հասկանում էին, որ Շուշին նորից Ղարաբաղի կենտրոն դառնալու դեպքում արագ կվերականգներ իր հայկականությունը, ուստի այն թույլ չտալու հեռահար նպատակով մարզի կենտրոն հռչակվեց Ստեփանակերտը: Կամ, երբ սկսվեցին արցախյան իրադարձությունները, ինչպե՞ս վարվեցին ադրբեջանական «մարդասերները» Շուշի քաղաքում փոքրամասնություն կազմող հայ բնակչության հետ: Հայերը պարզապես դուրս քշվեցին Շուշից, որտեղ հաստատված ադրբեջանական զորքերն իրենց զինանոցը պահում էին հայոց եկեղեցում՝ շատ լավ հասկանալով, որ դա զենքի պահեստի ամենասանվտանգ տեղն է, քանի որ հայերը չեն գնդակոծի իրենց սրբավայրը:

Հիշողության կորստի մասին է վկայում նաև այն իրողությունը, որ Ռ. Մեհրիկը մոռանում է անգամ ընթերցողին ներկայացնել Կավբյուրոյի 1921 թ. հուլիսի 5-ի որոշմամբ ինքնավարություն ստացած Լեռնային Ղարաբաղի սահմանները, որովհետև դրանք ներառել են ոչ միայն ԼՂԻՄ-ի տարածքը, այլև Գյուլիստանը և մինչև Չանգեզուրի գավառ ձգվող հողերը: Դրա համար կարելի է ծանոթանալ մինչև 1921 թ. հուլիսի 5-ը հրատարակված քարտեզներին, որոնցում Լեռնային Ղարաբաղն անմիջական սահման ուներ Հայաստանի ԽՍՀ-ի հետ: Էլ չենք խոսում այն հողերի մասին, որոնք հայաբնակ էին և ձգվում էին Գյուլիստանից մինչև ներկայիս ՀՀ Տավուշի մարզը: Այդ ժամանակ ԼՂԻՄ-ի բնակչության 94 տոկոսից ավելին կազմում էին հայերը, մինչդեռ՝ խորհրդային իշխանության

տարիներին ամեն ինչ արվեց մարզի էթնիկական պատկերը փոխելու համար: Ադրբեջանական իշխանությունների թեթև ձեռքով ադրբեջանական բնակչության քանակը հասավ 25 տոկոսի: Դա անթաքույց **գաղութացում** էր, որին զուգահեռ գործում էր նաև Նախիջևանի հայերի՝ կրկին Նախիջևան վերադարձի վրա ադրբեջանական իշխանությունների դրած արգելքը: Ահա այսպես էին հարգում Ադրբեջանի իշխանությունները իրենց ստանձնած պարտավորությունները: Եթե Ռ. Մեհթիևին թվում է, թե հայերը մոռացել են Նախիջևանի Ինքնավար Հանրապետության հայ բնակչությանը դուրս մղելու և Լեռնային Ղարաբաղի Ինքնավար Մարզը գաղութացնելու ադրբեջանական քաղաքականությունը, ապա չարաչար սխալվում են

Այս համատեքստում է նաև ներկայիս Հայաստանի Հանրապետությունը նույնպես ադրբեջանացիներով գաղութացված տեսնելու երազանքը փայփայող Ռ. Մեհթիևի այն պնդումը, թե Հայաստանը (իմա՝ Հայաստանի Հանրապետությունը – Բ.Հ.) մեկուսացված է և դեպի ծով ելք չունի, իսկ նրա բնակչությունն անընդհատ պակասում է, որովհետև հայերը... եկվորներ են: Եվ ո՞վ է այդ մասին գրում, մարդ, որի նախնիները եկել են Ալթայից: Ռ. Մեհթիևին առաջարկում ենք ծանոթանալ Մուրադ Աջիի «Древняя история тюрков и Великой степи» (Москва, 2007) (Թյուրքերի և Մեծ տափաստանի հին պատմությունը, Մոսկվա, 2007) աշխատությանը, որի հեղինակի հայ չլինելը կասկածից դուրս է: Եվ այդ գրքին որպես բնաբան ընտրված են հետևյալ խոսքերը՝ «Наша родина-степь, а колыбель-Алтай» («Մեր հայրենիքը տափաստանն է, իսկ բնօրրանը՝ Ալթայը»): Մինչդեռ իրականությունն այն է, որ հնդեվրոպական ժողովուրդների նախահայրենիքը գտնվել է Հայկական լեռնաշխարհում ու շրջակա տարածքներում, և հայերը մինչև 21-րդ դար հասած այն միակ ժողովուրդն են, որը չի հեռացել իր նախահայրենիքից:

Այնպես որ, եթե եկվորությունն է արտագնացության պատճառը, ապա Ռ. Մեհթիևին հարկ է ուշադրություն դարձնել վերջին տասնամյակներում ձևավորված Ռուսաստանի Դաշնության շուրջ 3 միլիոն կազմող ադրբեջանական համայնքի վրա, որի «...հայրենիքը տափաստանն է, իսկ բնօրրանը՝ Ալթայը»:

Ռ. Մեհթիևը հայերին հռչակում է եկվորներ, իսկ նրանց հայրենիքի արևելյան մասը՝ Արևմտյան Ադրբեջան, մինչդեռ ներկայիս Ադրբեջանի Հանրապետության տարածքի կեսը հայկական պատմական հողեր են: Ինչ վերաբերում է Կուրի ձախափնյակին, ապա գոնե մ.թ. I դարից այն վերածվել է կովկասյան-լեզգինական ժողովուրդների երկրամասի, որոնք այդպես էլ միասնական էթնոսի չվերածվեցին, բայց այսօր էլ բնակվում են ներկա Ադրբեջանի հյուսիսում և Ռուսաստանի Դաշնության մասը կազմող Դաղստանում և բոլոր իրավունքներն ունեն հավակնելու եկվոր թուրք-ադրբեջանացիների կողմից օկուպացված իրենց պատմական հողերին:

Ուրեմն՝ իրականում Ռ. Մեհթիևին գայրացում է այն միտքը, որ հայերը տեղաբնիկ կամ ավտոխթոն ժողովուրդ են, իսկ թուրք-ադրբեջանացիները՝ եկվոր տարր: Բայց անգամ մման ելակետային պայմաններում հայկական կողմը հանդես է գալիս ազգերի ինքնորոշման դիրքերից, այսինքն՝ հիմնվում է ոչ թե **պատմական**, այլ **միջազգային իրավունքի** նորմերի վրա: Եթե հայկական կողմը առաջնորդվեր մեհթիևների ցեղապաշտական կատեգորիաներով, ապա պետք է առաջադրեր եկվոր ադրբեջանացիներին Ալթայ վերադարձնելու խնդիրը: Իսկ եթե

ողջ աշխարհն առաջնորդվեր նման մտածելակերպով, չպետք է փլուզվեին Բրիտանական կայսրությունը կամ ԽՍՀՄ-ը, և Ադրբեջանը նույնպես անկախ պետություն դառնալու իրավունք չէր ունենա: Բայց Ադրբեջանի՝ որպես պետության սահմանները լեզվատիմ չեն անգամ ԽՍՀՄ-ի փլուզման համատեքստում, որովհետև նա իրեն հռչակել է թուրքական բանակի կողմից ստեղծված «Ադրբեջանական Դեմոկրատական Հանրապետության» իրավաժառանգորդը, որի կազմում չկային Գարաբաղն ու Նախիջևանը:

Այս ամենը վկայում է, որ հիշողության կորստի ակնհայտ ախտանշաններ դրսևորող Ադրբեջանի նախագահի աշխատակազմի ղեկավարը կամ այն մարդիկ, որոնք գրել ու նրան են հանձնել «Գորիս-2010. աբսուրդի թատրոնի տարեշրջանը» կեղծագիրը, տառապում են սեփական արատները ուրիշներին վերագրելու հիվանդությամբ, ինչը պատմաքաղաքական թերաբժեքության բացահայտ խոստովանություն է:

2. Պատմագիտական ասպատակությունների սկիզբը

Համարելով, որ միջազգային իրավունքի հետ կապված բոլոր հիմնախնդիրները լուծել է, Ռ. Մեհթիևն անցնում է պատմագիտական հարցերին՝ հայտարարելով, որ հայկական կողմի փաստարկային բազան և՛ միջազգային իրավունքի, և՛ պատմության հարցերում եղել և մնում է թույլ, քանի որ պատմական մասով այն իբր՝ հիմնված է ոչ գիտական եզրակացությունների, իսկ իրավական առումով՝ միջազգային իրավունքի դրույթների ազատ մեկնաբանության վրա: Բանը հասնում է այնտեղ, որ պատմության կեղծարարությունների ասպարեզում անփոփոխ առաջամարտիկի «պատիվը» միայն Թուրքիայի հետ վիճարկելու իրավունք ունեցող Ադրբեջանի նախագահի աշխատակազմի ղեկավարը փորձում է նման «պատիվ» վերագրել Հայաստանին:

Ուստի՝ փորձենք հերթով ներկայացնել Ռ. Մեհթիևի անունից առաջ քաշված տեսակետները և այլևայլ աղբյուրների հիման վրա պարզենք ողջ ճշմարտությունը:

Հենց սկզբից հարձակման անցնելու և հայկական կողմին կեղծարարության մեջ մեղադրելու համար Ռ. Մեհթիևը որպես «փաստարկ» է բերում հետևյալ անհիմն պնդումը, թե իբր՝ իրականությանը չեն համապատասխանում պատմության մեջ առաջինը քրիստոնեությունը պետական կրոն ընդունած երկիր ներկայանալու՝ հայերի հավակնությունները: Եվ իրեն ծիծաղելի վիճակում չդնելու համար «համեստորեն իրաժարվելով» քրիստոնեության ընդունման առաջնության հարցում «ադրբեջանական հավակնություններից» ու հայտարարելով, որ ադրբեջանական պատմագրությունը երբեք չի պնդել, թե կովկասյան ալբաններն առաջինն են ընդունել քրիստոնեությունը, Ռ. Մեհթիևը փորձում է նույն պատվից զրկել նաև Հայաստանին:

Նրա խոսքերով՝ գիտությանը վաղուց արդեն հայտնի է, որ դեռևս մ.թ. II դարի վերջերին, այսինքն՝ Հայաստանից ավելի քան մեկ դար առաջ, քրիստոնեությունը պետական կրոն է դարձել արամեական Եդեսիայի թագավորությունում: Այնուհետև բերվում են օտար լեզուներով ուսումնասիրություններ, որոնք իբր՝ հավաստում են այն «փաստը», որ Եդեսիայի Աբգար Բար Մանու (Աբգար V կամ Մանու VIII) թագավորը 165 թ. ընդունել է քրիստոնեությունը որպես պետական

կրոն: Այլ խնդիր է, որ հեղինակը չի էլ մտածում համապատասխան պատմական սկզբնաղբյուրները մատնանշելու մասին և բավարարվում է Սամուել Չիֆհամի, Հերբերտ Լոքյերի, Արոլֆ ֆոն Հարնակի և Իրֆար Շահիդի աշխատությունները նշելով⁶:

Բոլորովին չխորանալով հարցի մանրամասների մեջ, որովհետև խնդրի էությունը դրանից չի փոխվում, պատրաստ ենք քննարկելու հեղինակի առաջարկած 165 թվականը, թեև դրա համար հիմք հանդիսացած՝ Լաբուրնայի կամ Ղեբուրնայի պատմությունը այլևայլ մտորումների տեղիք է տալիս: Իսկ ո՞վ էր հիշյալ Աբգար թագավորը: Ընդամենը՝ Հռոմին ենթակա և **կայսրության մեջ մտնող** ստորակա «արքա»: Իսկույն ինձ կառարկեն, թե Մեծ Հայքի թագավորությունն էլ է վասալական կապերի մեջ գտնվել Հռոմեական կայսրության հետ: Միանգամայն ճիշտ է, սակայն Մեծ Հայքի թագավորությունը, եթե չհաշվենք Տրայանոս կայսեր կողմից 114-117 թվականների կարճատև ռազմակալումը, մինչև 387 թվականը եղել է առանձին թագավորություն և չի մտել Հռոմեական **կայսրության մեջ**: Իսկ Աբգար թագավորը ոչ թե առանձին երկրի տիրակալ էր, այլ ընդամենը՝ կայսրության մեջ մտնող մի փոքրիկ երկրամասի խամաճիկ «արքա»: Հետո, անկախ այն բանից, որ նա ընդունել է քրիստոնեությունը, ամենևին էլ փորձ չի արել արմատախիլ անել մյուս կրոնները: Ավելորդ է ասել, որ նա չէր էլ հանդգնի դիմել նման քայլի, քանի որ դա կարող էր շարժել հեթանոսության պաշտպան հռոմեական կայսեր գայրույթը: Այսպիսով՝ կհամարվի՞ր այս փաստը քրիստոնեության ընդունման փորձ, թե ոչ, դրանից հարցի էությունը չի փոխվում: Քրիստոնեությունը Եդեսիայի թագավորությունում ընդամենը դառնում էր հավասարազոր կրոնների մեջ **առաջինը, բայց ո՛չ պետականը**:

Իսկ ի՞նչ տեղի ունեցավ Մեծ Հայքի թագավորությունում. հայոց արքա Տրդատ Գ-ն և Գրիգոր Լուսավորիչն իրոք քրիստոնեությունը հռչակեցին պետական կրոն և արգելեցին ու բառիս իսկական իմաստով՝ փորձեցին արմատախիլ անել հեթանոսությունը: Մինչդեռ, եթե շարժվենք Ռ. Մեհթիսի մտածելակերպով, ապա քրիստոնեությունն արդեն Միլանի 313 թ. եղիկտով պետական կրոն էր դարձել Հռոմում: Բայց իրողությունը միանգամայն այլ է, քանզի այդ նշանավոր եղիկտով քրիստոնեությունը Հռոմեական կայսրությունում ընդամենը դարձել էր մյուս կրոններին հավասարազոր կրոն: Եվ բոլորովին էլ պատահական չէ, որ քրիստոնեությունը Հռոմեական կայսրությունում պետական կրոնի վերածվեց միայն տասնյակ տարիներ անց՝ Թեոդոսիոս Ա կայսեր կառավարման տարիներին:

Այնպես որ, դուր է գալիս նման փաստը Ռ. Մեհտիսին, թե ոչ, Մեծ Հայքի թագավորությունն առաջին երկիրն է, ուր քրիստոնեությունը հռչակվեց որպես պետական կրոն՝ 4-րդ դարի սկզբին: Իհարկե, ի վերջո Հայաստանը կարող էր և առաջինը չլինել քրիստոնեությունը պետական կրոն հռչակած երկրների մեջ, և դրանում ոչ մի դժբախտություն չէր լինի: Հայ պատմաբաններն ամենևին էլ չեն ձգտում արհեստականորեն հնացնել պատմական իրադարձությունները, ինչպես փորձեցին մեր հարևան վրացիները, երբ Հայաստանում քրիստոնեության պետական կրոն հռչակման 1700-ամյակի տոնակատարությունների հետ կապված՝ իսկույն գիտաժողով հրավիրեցին և փորձեցին ցույց տալ, որ քրիստոնեությունը Վրաստան մուտք է գործել 2000 տարի առաջ: Հայոց

⁶ Տե՛ս <http://www.Trend.az>, 29.10.2010, c. 7-8.

պատմությունն այնքան հին է ու հարուստ, որ հայ պատմաբանները՝ ի տարբերություն Ռ. Մեհֆիևի, բոլորովին կարիք չունեն կեղծարարությամբ զբաղվելու: Պարոն Ռ. Մեհֆիև, որքան էլ հայիոյանքի տարափ թափեք ձեր արևմտյան հարևանի վրա, միևնույնն է՝ պատմական փաստը մնում է փաստ:

Այնուհետև՝ Ռ. Մեհֆիևը մեղադրում է ՀՀ նախագահին Ստրաբոնի տեղեկությունները խեղաթյուրելու հարցում, թե իբր՝ Ստրաբոնը չի մատնանշել հայերի տեղաբնիկությունը Հարավային Կովկասում, որի տարածքները Հայաստանի կողմից այլ երկրներից ու ժողովուրդներից «գավթած հողեր» են⁷: Անհասկանալի է. Ռ. Մեհֆիևն ի՞նքն է միամիտ, թե՞ ուրիշներին է միամիտի տեղ դնում: Հենվե՞նք Ստրաբոնի վկայության ճիշտ այն հատվածի, վրա, որը մեջբերում է Ռ. Մեհֆիևը. «Պատմությունն ասում է, որ Հայաստանը՝ նախապես փոքր, աճեց այնուհետև Արտաշեսի և Ջարեհի ձեռքով, որոնք նախապես Անտիոքոս Մեծի գորավարներն էին և նրա անկումից հետո՝ թագավորներ, մեկը՝ Ծոփքի, Ալիսենեի, Օղոմանտիսի և այլ գավառների վրա, իսկ մյուսն Արտաշատի վրա: Երկուսն էլ մեծացան՝ շրջակա ազգերից գրավելով զանազան գավառներ, մարերից՝ Կասպիենեն, Փավնիտիսը և Բաստրոպեդան, վրացիներից՝ Պարիադրես [լեռան] ստորոտի գավառները և Խորզենեն և Գոգարենեն (իմա՝ Գուգարքը - Բ.Հ.), որը Կուրի մյուս կողմն է, խալյուրներից ու մոսիոնյկներից՝ Կարենիտիսը և Դերքսենեն (իմա՝ Դերջանը- Բ.Հ.), որոնք Փոքր Հայքին սահմանակից են, թեև նրա մասերը չեն, Կատաններից՝ Ալիլիսենեն (իմա՝ Եկեղիքը- Բ.Հ.) և Անտիտավրոսի [գավառը] և ստորիններից՝ Տամոնիտիսը (իմա՝ Տնորիքը- Բ.Հ.), այնպես որ բոլորը միախառն եղան»⁸:

Այո՛, Արտաշեսը և Ջարեհը հողեր են գրավել հարևան երկրներից ու ժողովուրդներից: Բայց, ի՞նչ է, Ռ. Մեհֆիևին թվում է, թե գրավելուն պես «նվաճվածները» անմիջապես սկսեցին հայերե՞ն խոսել գիտությանն անհայտ արագուսույցի միջոցով: Իրականությունն այն է, որ Երվանդունիների գահակալության վերջին շրջանում օգտվելով Հայոց թագավորության թուլացումից, հարևան երկրները գավթել էին վերջինիս ծայրամասային երկրամասերը, և Արտաշես Ա-ն ու Ջարեհը պարզապես ետ էին վերադարձնում հայկական երկրամասերը հարևան նվաճողներից: Այլ խոսքով՝ հայկական երկու թագավորություններին էին միացվել կորսված, բայց էթնիկ առումով հայկական երկրամասերը: Միայն այդ դեպքում էր հնարավոր միացված երկրների բնակչության միախառն լինելը:

Սակայն խնդիրն ունի մի այլ կողմ ևս: Թերևս հեղինակի մտքով անցնում է, թե Արտաշեսը հողեր է գրավել այսպես կոչված՝ Կովկասյան Ալբանիայից կամ Աղվանքից: Խորհուրդ ենք տալիս շատ չոզևորվել, որովհետև, երբ հայկական թագավորությունները ընդարձակվում էին հայկական ու հայաբնակ երկրամասերի միացումով՝ մարերից, վրացիներից, խալյուրներից, մոսիոնյկներից ու ստորիններից, սկզբնաղբյուրներում ամենաաննշան ակնարկ անգամ չկա, որ Հայոց Արևելից կողմերը, որ աղբբեջանցի պատմաբանները համարում են Աղվանքի մաս, միացվել են Մեծ Հայքի թագավորությանը: Պարզապես այս կեղծիքի ջրաղացին ժամանակին ջուր են լցրել որոշ հայ պատմաբաններ: Մինչդեռ, Ուտիքը որպես հայոց թագավորների ձմեռանոց հիշատակվում է

7 Տե՛ս <http://www.Trend.az> , 29.10.2010.

8 The Geography of Strabo» with an english translation by Horace Leonard Jones, in eight volumes, London, 1969, XI, 14.5.

Երվանդ Վերջին թագավորի օրոք (մ.թ.ա. III դարի վերջ) և բնական է, որ հանդիսացել է նաև Արտաշես Ա-ի Մեծ Հայքի թագավորության մասը⁹:

Ռ. Մեհթիսին շատ է հետաքրքրում այն հարցը, թե որքա՞ն ժամանակ է Հայաստանը եղել անկախ պետություն: Նա շուտասելուկի նման կրկնում է պատմության թուրքական կեղծարարներից վերցված այն հերյուրանքը, թե իբր՝ Հայաստանը մինչև 1918 թ. շատ կարճ ժամանակով է անկախ եղել՝ գտնվելով փաստական կամ բացարձակ կախվածության մեջ այլ տերություններից: Հետևում է հաջորդ եզրակացությունը՝ կարճատև անկախության շրջանում հայոց թագավորները փորձել են իրենց իշխանությունը տարածել հարևան երկրների վրա և իբր՝ բացառությամբ Տիգրան Մեծի ժամանակաշրջանի, տվյալներ չկան, որ Հայաստանը տիրել է ժամանակակից Ադրբեջանի տարածքին: Եվ միայն Տիգրան Մեծի օրոք է, որ Հայաստանը ժամանակավորապես իշխել է Արաքսից հյուսիս ընկած հողերի վրա: Միաժամանակ, ընդունելով, որ Ստրաբոնը Օրխիստենե-Արցախը հիշատակում է Հայաստանում, Ռ. Մեհթիսը անմիջապես արձանագրում է, թե իբր՝ հույն աշխարհագրագետը չի հայտնում, որ այնտեղ հայեր են ապրում¹⁰:

Ինչ խոսք, գործ ունենք այնպիսի պարզունակ կեղծարարի հետ, որի ստի ոտքերը, ինչպես ժողովուրդն է ասում՝ կարճ են: Սկսենք այն հանգամանքից, որ Օրխիստենե-Արցախը չի պատկանում այն երկրամասերի թվին, որոնք իրենց թագավորություններին էին միացրել Արտաշեսը և Չարեհը: Եվ եթե նրանց կողմից միավորված երկրների բնակչությունը, Ստրաբոնի խոսքերով՝ նույնպես հայալեզու էր, ապա ավելորդ է անգամ խոսել մինչ այդ էլ Մեծ Հայքին մաս կազմող Օրխիստենե-Արցախի ոչ հայկական լինելու մասին: Չարմանալին այն է, որ հեղինակին բացարձակապես չի հուզում այն իրողությունը, որ եթե իր աշխատության տվյալ հատվածում Ստրաբոնը չի հիշատակում Օրխիստենե-Արցախի հայերին, ապա ընդհանրապես տեղեկություն չկա այն մասին, որ Օրխիստենե-Արցախի բնակիչները այլազգիներ են: Թերևս նկատելով այս հանգամանքը հեղինակը հայտարարում է, թե կան բազմաթիվ այլ աղբյուրներ և վկայություններ, որոնք իբր՝ հավաստում են Արցախում աղվանական բնակչության առկայությունը: Եվ սեփական հորինվածքը հիմնավորելու համար բերում է Ստրաբոնի այն հաղորդումը, թե Կուրը հոսում է Ալբանիայով¹¹: Այս տեղեկության իսկությունը դեռևս կքննարկենք, սակայն մեզ զարմացնում է այն իրողությունը, որ Ռ. Մեհթիսը միանգամայն գիտակցաբար աչքաթող է անում Ստրաբոնի մյուս վկայությունները:

Այսպես, ինչու՞ է հեղինակը «մոռանում» հիշել այն փաստը, որ համաձայն Ստրաբոնի, Շակաշենը (Մակասենեն) և Արաքսենեն Հայաստանի մաս են կազմում¹²: Իսկ դա նշանակում է, որ Հայաստանի մեջ են գտնվել Օրխիստենե-Արցախից հյուսիս տարածվող Շակաշենը և արևելք գտնվող Օտենե-Ուտիքը: Բերենք այլ հաղորդումներ Ստրաբոնի «Աշխարհագրությունից».

«Մասամբ Վրկանաց ծովի և սրա ու Պոնտոսի միջև գտնվող ամբողջ պարանոցի հատվածում, գտնվում է Հայաստանի մեծ մասը...»¹³:

9 Տե՛ս Պատմութիւն Մովսիսի Խորենացւոյ, Տիղիս, 1913, գիրք ԽԴ, գլ. ԽԵ:

10 Տե՛ս <http://www.Trend.az>, 29.10.2010, c. 9.

11 Տե՛ս Strabo, XI, IV, 2 հեղինակը սխալմամբ գրել է XI, IV, 1:

12 Աճղ, II, I, 14:

13 Աճղ, II, V, 31:

«Մոսքիկեն, ուր կա նշանավոր մի տաճար, երեք մաս ունի, առաջինը բռնում են կողքիսացիք, երկրորդը՝ վրացիք, երրորդը՝ հայերը»¹⁴:

«Մեջտեղում կա մի դաշտավայր՝ ռոռզված գետերով, որոնցից մեծագույնն է Կուրը, որ սկիզբ է առնում Հայաստանից, մտնում է անմիջապես հիշյալ դաշտավայրը, ընդունում է իր մեջ Արագոսը, որ բխում է Կովկասից, ինչպես և ուրիշ ջրեր և մի նեղ հովտի միջով մտնում է Աղվանք: Այս երկրի և Հայաստանի միջև հոսելով՝ անցնում է բազմաթիվ հույժ մարդաշատ դաշտավայրերով, ընդունում է իր մեջ նաև ուրիշ շատ գետեր, ինչպիսիք են Ալազոնիոսը, Սանդոբանեսը, Ռոյտակեսը և Քանեսը, բոլորն էլ նավարկելի, և թափվում է Կասպից ծովը: Առաջ այս գետը կոչվում էր Կորոս»¹⁵:

«...իսկ (Աղվանքի - Բ.Հ.) հարավային սահմանի ողջ երկարությամբ տարածվում է Հայաստանը, որ հարուստ է դաշտերով ու լեռներով, ինչպես Կամբյուսենեն (իմա՝ Կամբեճանը-Բ.Հ.), որ գտնվում է այնտեղ, ուր Վիրքը, Աղվանքը և Հայաստանը իրար են սահմանակցում»¹⁶:

«...Արաքսենեի դաշտը, որով Արաքս գետն է հոսում մինչև Աղվանքի ծայրը և թափվում է Կասպից ծովը, և սրա հետ Շակաշենը (իմա՝ Սակասեն - Բ.Հ.)՝ սահմանակից է Աղվանքին և Կուր գետին, հետո Գոգարենեն (Գուգարքը- Բ.Հ.)»¹⁷:

«Երկրի (Հայաստանի-Բ.Հ.) մեծություը Թեոփանեսը դնում է հարյուր սքոյնաս, իսկ երկարությունը՝ կրկնակի դնելով մեկ սքոյնասը քառասուն ստադիոն: Սա չափազանցությամբ է տրված: Ավելի մոտ է ճշմարտությանը՝ երկարությունը դնել, ինչ որ ասել է լայնության համար, իսկ լայնությունը՝ դրա կեսը կամ մի քիչ ավելի»¹⁸:

Բերված փաստերը, որոնց այլ սկզբնաղբյուրներով հարստացնելը ոչ մի դժվարություն չի ներկայացնում, աներկբայորեն ցույց են տալիս, որ պարոն Ռ. Մեխիկը պարզապես կեղծում է: Նրա հիմնական կռվանը Կուր գետի՝ Աղվանքով հոսելն է, ինչպես հաղորդում է Ստրաբոնը: Բայց այս հարցը ևս ունի իր բացատրությունը, որն այժմ կներկայացնենք:

Խնդիրն այն է, որ և՛ Ալբանիա, և՛ Աղվանք անվանումները զուտ հայկական ծագում ունեն և ծագում են հայերեն «աղ» բառից: Մովսես Խորենացու հաղորդմամբ՝ Միսակը՝ Հայկի սերունդներից, ժառանգում է «Աղուանից դաշտը» և նույն դաշտի լեռնակողմը՝ Երասխից մինչև Հնարակերտ ամրոցը և «Աշխարհն յանուն քաղցրութեան բարուց նորա անուանեցաւ Աղուանք. զի աղու ձայնէին զնա: Եւ ի տրա ծննդոց այս Առան անուանի եւ քաջ կարգեցաւ կողմնակալ թիրաւոր ի Պարթեւէն Վաղարշակայ»¹⁹:

Մովսես Կաղանկատվացին, որն ամբողջությամբ օգտվել է Պատմահորից, «Աղուանք» անվան առաջացումը կապում է Առանի և ոչ թե Միսակի քաղցր բարքի հետ²⁰: Հայտնի է, որ «աղու»-ն առաջացել է «աղ»-ից՝ հանդիսանալով վերջինիս գործիական հոլովի գրելաձևը: «Աղու» նշանակում է աղով համեմված, այսինքն՝ անուշ, քաղցր, համեղ և, ինչպես կտեսնենք, նաև արգավանդ²¹: Սակայն միշտ չէ,

14 Անդ, XI, I, 18:

15 Անդ, Strabo XI, III, 2-3:

16 Անդ, XI, IV, 1:

17 Անդ, XI, XIV, 4:

18 Անդ, XI, XIV, 11:

19 Մովսես Խորենացի, գիրք Բ, գլ. Ը:

20 Տե՛ս Մովսես Կաղանկատուացի, Պատմութիւն Աղուանից աշխարհի, Եր., 1983, էջ 8 (գլ. Դ):

21 Տե՛ս Գր. Աճառյան, Հայերեն արմատական բառարան, հատ. Ա, Եր., 1971, էջ 114-117:

որ «ադ» բառի գործիականը եղել է «ադու»: Գրան նախորդել է «ալով» ձևը, որը փոխառել է վրացերենը՝ ծնունդ տալով *gaaloveba* բառին, որը վրացերենում նշանակում է քաղցրանալ, անուշ համ ստանալ²²:

Սակայն, «ալով» ձևին նախորդել է վաղնջական «ալթ» ձևը: Սկզբնապես հայերը որպես «արգավանդ դաշտի երկիր»՝ «Ալթբանք» էին կոչում Կուր գետի աջափնյակը, ինչպես պարզ երևում է Մովսես Խորենացու հաղորդումից: «Ալթբանք»-ը սոսկ աշխարհագրական հասկացություն էր, և քանի որ Կուրի ձախափնյակը կազմում էր այդ մեծ և ընդարձակ դաշտի շարունակությունը, Աղվանք արշաված հռոմեացիների այն հարցին, թե ինչ երկիր է գտնվում Կուրի ձախափնյակում, հայերը պատասխանեցին «Ալթբանք», այսինքն՝ «արգավանդ դաշտի երկիր»: Հռոմեացիները վերածեցին «Ալթբանք»-ը «Ալթբանիա»-ի, և քանի որ հեռավոր Շոտլանդիայում և Գալլիայում կային Ալթբաններ, իսկ Իտալիայում՝ Ալթբանու մոնս (իմա՝ Ալթբանական լեռներ-Բ.Հ.), դրանց նմանությամբ Ալթբանիան վերածեցին Albania-ի: Այս ձևը պահածոյացվեց հունահռոմեական աշխարհում, սակայն հայերենում ենթարկվեց հայերենին հատուկ հնչյունական փոփոխությունների: «Ալթբանք»-ն այնուհետև վերածվեց «Ալովանք»-ի, իսկ «ով»-ի «ու» վերածման հետևանքով՝ «Աղուանքի»: Շատ ավելի ուշ, երբ «լ»-ն սկսեց «ղ» արտասանվել, «Ալուանք»-ը հայերենում դարձավ «Աղուանք»: Ամեն ինչից դատելով՝ այդ մասին իմացել է նաև ամասեցի մեծ աշխարհագրագետը՝ Ստրաբոնը, երբ գրում է, որ Կուրն անցել է Ալթբանիայի միջով, այլ խոսքով՝ Ալթբանական դաշտի: Սա է ճշմարտությունը, թեև այդ մասին կարելի էր և չգրել, որովհետև այսպես կոչված **ալթան-ալվանների՝ աղբբեջանցիների նախնիներ լինելու մասին պնդումը հավասարազոր է հույների՝ թուրքերի նախնիներ համարելուն:**

Ուստի՝ աղբբեջանցիների համար ոչ մի նշանակություն չունի՝ Հայաստանը տիրե՞լ է Աղվանքին, թե՞ ոչ: Իրականությունն այն է, որ այդ երկիրը ոչ միայն Տիգրան Մեծի օրոք, այլև հետագա դարերում բազմիցս հայտնվել է Մեծ Հայքի թագավորության նկատմամբ ստորակա վիճակում: Փաստեր, ինչքան ասես, կարելի է բերել դրա օգտին: Պարզապես հիշատակենք դրանցից մեկը: Մեծ Հայքի թագավորության «Գահնամակ» կամ ուսումնասիրողների կողմից՝ «Ջորանամակ» կոչված փաստաթղթում ասվում է, որ հայոց բանակի թվաքանակն այլ գրավյալ աշխարհներում գտնվող զինվորների հետ կազմել է 120 000 մարդ: Շատ կարևոր է, որ այդ աշխարհները համարվում են գրավյալ: Հասկանալի է, որ Հայոց թագավորությունը չէր կարող տիրել իր երկու հարևան մեծ տերություններին, ուստի խոսքը հստակ վերաբերում է Վիրքին ու Աղվանքին²³:

Ու Մեթիկի կողմից բարձրացված հարցերից մեկն աղբբեջանական ժողովրդի կազմավորման խնդիրն է, որովհետև, ըստ հայ հեղինակների՝ աղբբեջանցիները որպես ազգ հանդես են եկել մեզանից մեկ դարից էլ պակաս ժամանակ առաջ, և ինչ եղել է այդ տարածքում մինչև XX դարի սկիզբը, աղբբեջանցիների հետ կապ չունի:

Անկեղծորեն ասած՝ մեր արևելյան հարևանները կկոչվեն թյուրքեր թե՞ աղբբեջանցիներ, գործնականում ոչ մի նշանակություն չունի: Որոշակի փաստ է, որ թյուրք-սելջուկյան ցեղերը առաջին անգամ հայտնվեցին ներկայիս Աղբբե-

22 Անդ, էջ 116:

23 Տե՛ս Н. Адонц, Армения в эпоху Юстиниана, СПб, 1908, с. 252.

ջանի Հանրապետության արևելյան և մասամբ՝ արևմտյան հատվածներում միայն XI դարի կեսերին: Իսկ թե ինչպե՞ս են ընթացել ժողովրդագրյացման գործընթացները, կարելի է հստակ արձանագրել միայն XVI դարի սկզբի իրադարձություններով: Կարող է հարց ծագել, թե ինչու՞ սկսել միայն XVI դարի սկզբի իրադարձություններից: Հարցի պատասխանը հետևյալն է. ո՛չ կարա-կոյունլուների տիրապետության և ո՛չ էլ աղ-կոյունլուների իշխանության շրջանում այդպես էլ որոշակի ժողովուրդ չձևավորվեց: XVI դարի սկզբներին ղրզլըբաշական ցեղերի կողմից ստեղծվեց Սեֆյան պետությունը, որն աղբբեջանցի պատմաբանները հակված են համարելու «աղբբեջանական»: Բոլորովին էլ վեճի մեջ չենք մտնում մեր «հնարամիտ» ընդդիմախոսների հետ, քանզի ղրզլըբաշների պետության էությունը, չնայած իշխանության գլուխ անցած թյուրքական ցեղերին, անվիճելիորեն պարսկական էր, ինչը վեր է ամեն մի կասկածից: ԽՆդիրն այն է, որ այդ պետության հիմքում դրված էր ոչ թե ազգային սկզբունքը, այլ **շիա դավանանքը**: Եթե անգամ հիաթթետիկ կերպով ընդունենք, որ պետությունը եղել է այսպես կոչված՝ «աղբբեջանական», միևնույնն է՝ ղրզլըբաշական ցեղերի շրջանում միասնական ժողովրդի մտածելակերպ ու հոգեկերտվածք գոյություն չունեը: Եվ դա մեծապես պայմանավորված էր սեփական պետության քացակայությանը: Ուրեմն՝ կարո՞ղ է արդյոք որևէ աղբբեջանցի պատմաբանի մտքով անցնել, թե, օրինակ՝ Շահ-Աբբասը չի եղել պարսից շահ, չնայած նրա թյուրքական ծագումը վեր է ամեն կասկածից:

Հայտնի է, որ սեփական պետության գոյության պայմաններում ֆրանսիական ժողովրդի ձևավորումը տևեց մի քանի դար: Նույնը կարելի է ասել ռուս և գերմանական ժողովուրդների մասին: Ուստի՝ եթե XVI դարի սկզբին մենք գործ ունենք ոչ թե միասնական ժողովրդի, այլ ցեղերի հետ, ապա պահանջվելու էր առնվազն մի քանի դար այն ժողովրդի կազմավորման համար, որը կոչվել է թուրք, իսկ ներկայումս անվանվում է աղբբեջանցի: Պարսկական պետության պայմաններում, երբ ամեն ինչի հիմքում դրված էր իսլամի շիա դավանանքը, ժողովրդագրյացման գործընթացներն առանձնապես արագ չէին: Եվ պատահական չէ, որ Իրանի թյուրքալեզու բնակչության շրջանում միայն վերջերս են ի հայտ գալիս առավել կամ պակաս չափով ազգային զգացումներ: Եթե անգամ ընդունենք, որ արդեն պարսկական տիրապետության շրջանում նախադրյալներ էին հասունացել աղբբեջանական ժողովրդի ձևավորման համար, ապա պետք է եզրակացնենք, որ այդ գործընթացներն արագացան միայն ռուսական տիրապետության շրջանում: Համենայն դեպս, **19-րդ դարի երկրորդ կեսից ավելի շուտ հնարավոր չէ մատնանշել աղբբեջանական ժողովրդի վերջնական կազմավորումը**:

3. Տեղանունների նենգափոխման աշխատակարգերը

Միայն ժպիտներ կարող են շարժել Ռ. Մեհթիևի մտավարժանքներն «Աղբբեջան» անվանման շուրջ²⁴: Սկսենք այն խնդրից, թե ինչպե՞ս են առաջացել Ատրպատական, իսկ դրանից էլ՝ Աղբբեջան և Ազարբայջան աշխարհագրական հասկացությունները:

«Ատրպատական» անվանումը տրվել է Մարաստանի արևմտյան հատվա-

24 Տե՛ս <http://www.Trend.az>, 29.10.2010, c. 10-11.

ծին, որը որպես սատրապություն հանձնվել էր Ատրպատին, որի անունը ոչ այլ ինչ է, բայց եթե ոչ՝ «կրակի պետ» կամ «կրակի քուրմ»։ Եվ եթե հետագայում առաջացավ Ատրպատականի թագավորությունը, ապա այն սուկ Մարական պետություն էր։ Իսկ մարերը պարզապես իրանական ցեղեր էին և ոչ մի կերպ չեն կարող համարվել ադրբեջանցիների նախնիներ։ Այն իրանական երկիր էր Մասանյանների օրոք, ինչպես նաև արաբական տիրապետության շրջանում։ Ուստի, անկախ այն հանգամանքից, թե արաբական տիրապետության շրջանում Ազարբայջանը՝ որպես վարչական միավոր, ինչ տարածքներ է ընդգրկել, այն ընդամենը վարչական միավոր էր։ Եթե Ռ. Մեհթիևն այդքան օբյեկտիվ է, ապա ինչու՞ չի նշում, որ **արաբական Արմինիա վարչական միավորը ընդգրկում էր ոչ միայն Հայաստանը, այլև Վիրքը և Աղվանքը**, որը հեղինակը մշտապես կոչում է Կովկասյան Ալբանիա։ Թո՛ղ Ռ. Մեհթիևին հայտնի լինի, որ վարչական միավորները կարող են և՛ ընդարձակվել, և՛ փոքրացվել։ Ըստ որում, սովյալ դարում Ազարբայջանը Արաբական խալիֆայության վարչական միավոր էր։ Եվ եթե հեղինակը հետաքրքրվում է Արմինիա ոստիկանության վարչական տարածքով և սահմաններով, ապա կարող է դիմել Ա. Տեր-Ղևոնդյանի “Армения и Арабский халифат” (Ереван, 1977) (Հայաստանը և Արաբական խալիֆաթը, Եր., 1977) աշխատությանը։

Ռ. Մեհթիևը վկայություններ է բերում այլևայլ հեղինակներից՝ ցույց տալու համար, թե իբր՝ «Ադրբեջանը» տարածվել է Երասխից և՛ հյուսիս, և՛ հարավ։ Մասնավորապես՝ նա հենվում է Թավրիզում անգլիական հյուպատոս Քեյթ Աբբոթի 1864 թ. հուլիսի վրա, որտեղ սավաժ է. «Երկիրը, որ հայտնի է պարսիկներին որպես Ադրբեջան, բաժանված է նրանց (Պարսկաստանի) և Ռուսաստանի միջև։ Վերջինս տիրապետում է (Ադրբեջանի) 5/8-ին, տարածք, որը կազմում է 80.000 քառ. մղոն, կամ էլ հավասար է Մեծ Բրիտանիայի տարածքին, այսպիսով, 50.000 քառ. մղոնը պատկանում է Ռուսաստանին և 30.000 քառ. մղոնը՝ Պարսկաստանին։ Ռուսական մասը սահմանակցում է հյուսիսից և հյուսիսարևմուտքից Կովկասյան լեռներին, որոնք ձգվում են մինչև Բաքվի շրջակայքը՝ Կասպից ծովի ափերը։ Արևմուտքում նրա մեջ մտնում են Իմերեթիայի, Մինգրելիայի, Գուրիայի և Ախալցխայի պրովինցիաները, որոնք պատկանում են այժմ Ռուսաստանին. արևելքում [սահմանը] Կասպից ծովն է, հարավում [սահմանը] ողողվում է Երաքս գետով ... Մուղանի տափաստանի վրայով մինչև Թալիշի օկրուգը և փոքրիկ Աստուրա (իմա՝ Աստարա-Բ. Հ.) գետով, որը հոսում է այդ երկրամասով դեպի Կասպից ծով։ Այդ մարզի մեջ մտնում են հետևյալ տարածքները՝ Վրաստանը կամ Գյուրջիստանը, որը բաղկացած է Կախեթիայից, Մոմխիթից, Ղազախից, իսլամական Էրիվան, Նախիջևան, Ղարաբաղ, Գյանջա, Շիրվան, Շաքի, Շամախի, Բաքու, Ղուբա, Մալյան մարզերից և Թալիշի մի մասից»²⁵։ Հեղինակի կարծիքով՝ չի կարելի անգլիական հյուպատոսին մեղադրել կեղծիքի և «ադրբեջանական քարոզչությանը» ծառայելու մեջ։ Հետևում է եզրակացությունը, թե իբր՝ 19-րդ դարի 60-ական թվականներին Երևանի, Նախիջևանի և Ղարաբաղի բնակչությունն անգամ՝ հայերի այստեղ գաղթելուց հետո գերազանցապես մնում էր մահմեդական, այլ խոսքով՝ թյուրքական։

Անշուշտ, անգլիացի հյուպատոսին չես մեղադրի «**ադրբեջանական**

25 Keith E. Abbott, Extracts from a Memorandum on the Country of Azerbaijan, Proceedings of the Royal Geographical Society of London, , Vol. 8, N 6 (1863-1864), pp. 275-279.

քարոզչությանը ծառայելու» մեջ, սակայն նրան անվերապահորեն կարելի է մեղադրել **անտեղյակության**, իսկ Ռ. Մեհրիևին՝ **անգրագիտության** մեջ: Հյուպատոսի խոսքերով՝ Ադրբեջանի մեջ արևմուտքից մտել են Իմերեթիան, Մենգրելիան, Գուրիան և Ախալցխան: Հասկանալի է, որ նրա խոսքերը մեջբերած հեղինակին դա չի հետաքրքրում, բայց նրան շատ է հուզում Երևանը, Նախիջևանը և Ղարաբաղն Ադրբեջանի կազմում տեսնելը: Սակայն, անհասկանալի է մնում, թե Թավրիզի անգլիական հյուպատոսն ինչպե՞ս է «Ադրբեջանի» մեջ մտցրել Արևմտյան Վրաստանի վերոհիշյալ պրովինցիաները, որոնք երբեք Պարսկաստանին չեն պատկանել և ամենալավ ցանկության դեպքում անգամ չէին կարող մտնել Ադրբեջան կոչված վարչական միավորի մեջ: Անգամ ապշել կարելի է, երբ հյուպատոսը փորձում է **Գյուրջիստանը** մտցնել Ադրբեջանի մեջ: Խնդիրն այն է, որ 1762 թվականից Արևելա-վրացական թագավորությունը Պարսկաստանից ընդհանրապես անկախ երկիր էր՝ մինչև Ռուսական կայսրությանը միացվելը, իսկ դրանից առաջ էլ ներկայացնում էր թեկուզև Պարսկաստանից կախյալ, բայց ստորակա երկու թագավորություններ՝ Զարթլիի և Կախեթի: Ինչպես տեսնում ենք՝ անգլիական հյուպատոսի գրածը հիշյալ տարածքների խնդրում պարզապես անհեթեթություն է: Իսկ եթե առկա է մեկ անհեթեթությունը, ապա որքա՞ն է հիմնավորված նրա վրա հենվելու՝ Ռ. Մեհրիևի բռուն ցանկությունը:

Այժմ անցնենք Երևանի, Նախիջևանի, Ղարաբաղի և Գանձակի (Գյանջայի) այսպես կոչված՝ «մահմեդական պրովինցիաներ» լինելուն: Թավրիզի հյուպատոսը պարզապես ուղտի ականջում քնած է եղել: Եթե 19-րդ դարի առաջին երեք տասնամյակներում հայ բնակչությունը քանակով մի փոքր զիջում էր իսլամական բնակչությանը, որի մասին ստորև մանրամասն կպարզաբանենք, ապա 19-րդ դարի 60-ական թթ. խոսել նման իրադրության մասին, առնվազն ծիծաղելի է, քանի որ պատկերն այլ էր: Ուրեմն՝ փոխանակ անգլիական հյուպատոսի **անտեղյակությունը** հորթի հրճվանքով փողիարելու, պարզապես կարելի էր դիմել ռուսական պաշտոնական վիճակագրության տվյալներին, որոնք այլ պատկեր են հաղորդում: Եթե այսպիսի պատահական հաղորդումներով պետք է առաջնորդվի պարոն Ռ. Մեհրիևը, ապա կարելի է **լիակատար համոզմունք հայտնել արդի ադրբեջանագիտության ոչ գիտականության մասին:**

Անշուշտ, Հայաստանում քոչվոր թյուրքական տարրի հաստատվելու արդյունքում, բավական թիվ են կազմել թուրքական տեղանունները²⁶: Դա պայմանավորված էր եկվոր տարրի ժամանակավոր տիրապետության փաստով: Թո՛ղ Ռ. Մեհրիևին հայտնի լինի, որ թյուրքական տարրը մեծ մասամբ թարգմանել է հայկական տեղանունները, հարմարեցրել իր լեզվին և միայն շուրջ 10 տոկոսի չափ է, որ ինքն է ստեղծել տեղանուններ՝ քոչվորականի պարզ մտածելակերպին համապատասխան: Եթե քոչվորի աչքին ջուրը սև էր երևում, ապա անմիջապես գետը կամ գետակը ստանում էր Ղարա-սու (Սև ջուր) անունը, եթե քարը քթի տեսք ուներ, ապա ստեղծվում էր Ղարա-բուրուն (Քթանման քար) անունը, եթե ժայռը հիշեցնում էր գայլի ականջ, ապա ծնունդ էր առնում Ղուրդ-դուլաղ (Գայլի ականջ) անունը և այլն: Հայաստանում հիշատակվում է մահմեդաբնակ Գոնգուզլու գյուղը (իմա՝ Խոզիչեն- Բ.Հ.): Հարց է ծագում, թե մահմեդականներն ինչպե՞ս կարող էին իրենց գյուղն անվանել Գոնգուզլու: Իրականում մահմեդական վերաբնակիչները՝

26 Տե՛ս <http://www.Trend.az>, 29.10.2010, c. 12.

տեր դառնալով հայկական գյուղին, պարզապես հայերեն Դոնկույս (Գետակողմ-Բ.Հ.) գյուղանունը հարմարեցրել էին իրենց լեզվին ու վերափոխազատել այն:

Հայաստանի Սյունիք աշխարհում հայ նշանավոր պատմիչ Ստեփանոս Օրբելյանը հիշատակում է Քուռակախաղաց լեռը, որը հետագայում Սյունիքում հաստատված թյուրքական ցեղերը պարզապես թարգմանել են և կոչել Գուլուն-օյնադ, այսինքն՝ քուռակը խաղում է²⁷: Նույնը կարելի է ասել Ստեփանոս Օրբելյանի հիշատակած Հարսնավազ և Վայոց ձորի Հարսնասար լեռնանունների մասին, որոնք թյուրքական ցեղերը թարգմանելով վերածել են Գայլինդայայի (իմա՝ Հարսնաժայռ- Բ.Հ.): Ընդ որում՝ այս ցանկը կարելի է անվերջ շարունակել:

Որչափ մեզ հայտնի է, Ռ. Մեհթիսն ընդամենը փիլիսոփայական գիտությունների դոկտոր է, հետևաբար՝ առավել քան զարմանալի է, որ նա փորձում է իր գիտելիքները ցուցադրել լեզվաբանության բնագավառում: Հայերենի բազմաբարբառ լինելը նրան բերել է այն անհեթեթ մտքին (ինչը նա աշխատում է վերագրել ինչ-ինչ լեզվաբանների), թե հայերենը չի հանդիսանում մեկ ժողովրդի լեզու: Եվ դա փորձում է հիմնավորել դամբարաններից հայտնաբերված զանգերի տարբերությամբ՝ ժամանակակից հայերի զանգերից: Ավելորդ է ասել, որ սա իսկական **հիմարություն** է, որովհետև ո՛չ ժողովուրդը և ո՛չ ազգը գենետիկ երևույթ չեն, այլ սոցիալական: Հեղինակը չգիտի կամ էլ ավելորդ է համարում նշել, որ զանգի ձևը կամ տեսակը կարող է փոխվել՝ կապված անգամ սննդի փոփոխության հետ:

Հատկապես ցնցող է այն միտքը, թե համարձակ կարելի է կասկածի տակ առնել հայերի կապն արմենների²⁸ հետ: Թո՛ղ Ռ. Մեհթիսին հայտնի լինի, որ հայերն ունեն մեկ էթնանուն՝ հայ, իսկ հարևան ժողովուրդները հայերին կոչել են «արմենիներ» կամ «արմանիներ»՝ հայոց թագավոր Արամանիի անունով, ով մեծ համբավ էր ձեռք բերել հարևան ժողովուրդների շրջանում իր քաղաքական մեծագործություններով: Եվ ընդհանրապես՝ նման տարրական գիտելիքներից զուրկ հեղինակը լավ կանի, որ զբաղվի ժամանակակից աղբբեջանցիների զանգերի ուսումնասիրությամբ, որպեսզի համոզվի, որ զանգաբանական առումով գործ ունի առավել քան բազմազանության հետ: Իսկ հայերի զանգաբանական տիպն այնքան բնորոշ է, որ գերմանացի մարդաբան ֆոն Լուշանը այն պարզապես կոչել է «արմենոիդ»:

Ըստ Ռ. Մեհթիսի՝ հայերը հայացրել են նաև **Արցախ** տեղանունը և հորինել **Վարարակն** բնակավայրը, որի մասին խոսք կա ՀՀ նախագահի հոկտեմբերի 18-ին Գորիսում ունեցած ելույթում: Ըստ Ռ. Մեհթիսի, իբր՝ ոչ մի սկզբնաղբյուրում տեղեկություն չկա Վարարակն բնակավայրի մասին և այդ անունը հորինված ու արհեստականորեն ամրագրված է այն վայրին, որտեղ Վարաբաղի խաների կողմից հիմնադրվել է Խանքյանդին: Ավելին՝ Վարարակնը, որ նա գիտակցաբար գրում է փոքրատառով, իբր անօգուտ հորինվածք է հայկական քարոզչության կողմից: Նա պնդում է նաև, որ «հին հայկական» են հռչակվում այնպիսի մտացածին տեղանուններ, ինչպիսիք են Բերձորը, Քարավաճառը, Քաշաբաղը և անգամ Տիգրանակերտ քաղաքը՝ ձեռքի տակ չունենալով գիտական լուրջ փաստեր: Չափից դուրս խորանալով իր անթաքույց կեղծարարության մեջ՝ նա գրում է, որ վերջինիս տրվել է Տիգրանակերտ անվանումը, քանի որ այդ հողը դուր է եկել հայերին, որոնց նվաճողական պլանները հիմնավորելու համար «պատմական կեղծարարության» լաբորատորիաները «հորինել են կեղծ վկայություններ և տարեգրություններ, որոնց

27 Տե՛ս Ստեփանոս Օրբելյան, Պատմութիւն նահանգին Սիսական, Տիփլիս, 1910, էջ 361:

28 Տե՛ս <http://www.Trend.az>, 29.10.2010, с. 11.

վրա խելոք տեսքով հայերը հենվում են²⁹»:

Նման պնդումներին ծանոթանալուց հետո սկզբում մարդ ակամա մտածում է, որ այդ աստիճանի անհեթեթություններին պատասխանելը ժամանակի անիմաստ կորուստ է: Սակայն կփորձենք Ռ. Մեհթիևի անգրագիտությունը ջրի երես հանել՝ ամենախիստ կերպով:

Իսկ ի՞նչ զարմանալի բան կա, որ Արցախ անունը հայկական է: Արցախ տեղանվան երկրորդ մասը պարզապես նշանակում է «անտառ», ինչը հանդիպում է սանսկրիտում, պարսկերենում և բազմաթիվ հնդեվրոպական լեզուներում³⁰: Տեղանվան առաջին մասը, որ այն հեռավոր ժամանակներում հնչելու էր «աւր-aur» և ընկալվելու էր Վանյան արձանագրության մեջ և հույների կողմից «O», նշանակել է «գովաշունչ քամի»³¹: Եվ քանի որ սեպագիրը չի տարբերակում «O»-ն և «Ու»-ն, տեղանունը Վանյան արձանագրության մեջ արտահայտվել է Urt. che գրությամբ: Այլ խոսքով, Արցախ նշանակել է «Քամոտ անտառ», ինչը լիովին համապատասխանում է նրա անտառապատ բնությանը: Երբ Սարղուր Բ-ի զորքերը հասան Արցախ, բայց չներխուժեցին այնտեղ, հավանաբար նրա հարցին, թե ի՞նչ երկիր է լեռնապարի մյուս կողմում, հետևել է պատասխանը՝ «Քամոտ անտառ»: Եվ դա իրոք հասկանալի է, քանի որ Գեղամա լճի անտառագուրկ ավազանի բնակիչների համար Արցախի բնորոշ կողմը նրա անտառապատ լինելն էր:

Արցախի Տիգրանակերտի գոյությունը, որն արձանագրել են Հայոց Պատմահայր Մովսես Խորենացին³², Մեբեոս պատմիչը³³ և ուրիշներ, իսկ նրա ավերակները նկարագրել են Ս. Ջալալյանը, Մակար Բարխուդարյանը և ուրիշներ, լիովին հաստատվեց վերջին պեղումների շնորհիվ:

Հեղինակը տարտամ պատկերացում ունի «Խանքյանդի» հասկացության վերաբերյալ: Նախ, Խանքյանդին, չնայած որ նշանակում է Խանիչեն, բոլորովին էլ չի հիմնվել Ղարաբաղի խաների կողմից, այլ կառուցվել է 1847-ին՝ ռուսների կողմից որպես զորանոց: Սակայն ժամանակի ընթացքում զորամասը տեղափոխվում է այդտեղից, և մնում են լոկ ամուսնացածների ընտանիքները, որոշ զինվորականներ և կազակներ: Գրանից հետո այստեղ հաստատվում են շուրջ 60-ի չափ ընտանիքներ, որոնք հարևան Շուշուց, Կարկաժան, Խանաձախ, Գյուլլուջա և Փահլուլ գյուղերից տեղափոխվում են Խանքյանդի: Իսկ այժմ Վարարակնի մասին, որն այդքան զայրացրել է Ռ. Մեհթիևին: Բանն այն է, որ Խանքյանդի գյուղի տափարակը պատկանել է հայկական Վարարակն գյուղի բնակիչներին, որոնց քարակերտ եկեղեցին և հանգստարանը պահպանվում են տափարակի հյուսիսային ձորակի ձախ լանջի վրա՝ Վարարակն աղբյուրի մոտ: Նախապես Վարարակն գյուղի բնակիչները փոխադրվում են Շուշի, և ամայացած գյուղի տարածքի վրա ռուսները կառուցում են վերը հիշատակված զորանոցը:

Ռ. Մեհթիևը մտացածին է հայտարարում Բերձոր, Քարավաճառ, Քաշաթաղ և բազմաթիվ այլ հայկական տեղանուններ: Եթե հեղինակն իրեն մի փոքր անհանգստություն պատճառներ և ծանոթանար V դարի աշխարհագրական մտքի

29 Նույն տեղում:
30 Տե՛ս Զր. Աճառյան, Գայերեն արմատական բառարանում, հատ. Դ, եր., 1979, էջ 446:
31 Տե՛ս անդ, հատ. Ա, էջ 362:
32 Տե՛ս Մովսես Խորենացի, գիրք Ա, գլ. Լ:
33 Տե՛ս Մեբեոսի եպիսկոպոսի Պատմութիւն, եր., 1939, գլ. ԼԶ:

կոթող «Աշխարհացոյց»-ին, ապա կհամոզվեր, որ Բերձոր անունը, որ կնշանակի «բովանգքերի ձոր», դեռ դրանից առաջ էլ գոյություն է ունեցել³⁴:

Որքան էլ տհաճ լինի Ռ. Մեհթիևի համար, ստիպված ենք արձանագրել, որ Քարավաճառը գտնվել է Թարթառ գետի վերին հոսանքի շրջանում և այդպես է կոչվել քարի շուկա ունենալու համար: Եղել է գրչության կենտրոն, պահպանվել են մի քանի հիշատակարաններ՝ գրված Քարավաճառում: 18-րդ դարի երկրորդ կեսին այստեղ մուտք գործած քրդական ցեղերը աղավաղել են այդ անվանումը՝ վերածելով Քյալբաջարի³⁵:

Քաշաթաղ անունը շատ կիրառական է հայ մատենագրության մեջ: Բայց մենք կբերենք միայն մի հիշատակություն, որը տեղ է գտել հայ պատմիչ Ստեփանոս Օրբելյանի աշխատության մեջ: Խոսելով Սյունիքի գավառների մասին՝ նա գրում է. «Հինգերորդ՝ Աղահեջ գաւառ, որ այժմ կոչի Քաշաթաղ և Խոժորաբերդ»³⁶:

Կարծում ենք՝ Ռ. Մեհթիևն էլ մեզ հետ համաձայն կլինի, որ վերոհիշյալ աշխատությունների հեղինակները հագիվ թե իրենց երկերը գրած լինեն՝ ազդվելով 20-րդ դարավերջի և 21-րդ դարասկզբի քաղաքական խնդիրներից:

Այս ամենից հետո հեղինակի բերած թյուրքալեզու տեղանունների ցանկը լոկ կարող է տարակուսանք առաջացնել: Իսկ ի՞նչ զարմանալի բան է, որ օտար տիրապետության պատճառով Հայաստանում ծնունդ են առել թյուրքական տեղանուններ, որոնց թիվը բազմապատկվել է 17-րդ դարի սկզբին տեղ գտած հայերի բռնագաղթի հետևանքով, երբ այդ տեղանունները կրողներին բռնի հարկադրել են հայրենիքը թողնել, իսկ մահմեդական քոչվոր ցեղերը աչ ու ձախ նոր անվանումներ են տվել: Հասկանալի է, որ 19-րդ դարի առաջին երեսնամյակում Պարսկաստան քշվածների և պարսկահայերի մի մասի՝ Արևելյան Հայաստանի ռուսական տիրույթներ վերադարձից հետո գործնականում վիճակը չփոխվեց, քանի որ նրանք գործ ունեցան նոր տեղանունների հետ: Ըստ էության՝ այս ցանկին կարելի էր ընդհանրապես չանդրադառնալ վերը նշված հանրահայտ պատճառով, սակայն ցուցակում տեղ են գտել այնպիսի անգրագիտություններ, որոնք չմատնանշելը պարզապես սխալ կլինի:

Ռ. Մեհթիևը հիշատակում է **Բասարգեչարը**³⁷, որը վերանվանվել է Վարդենիս, բայց բոլորովին չի կամենում նշել, որ մինչև քոչվոր ցեղերի կողմից Բասարգեչար կոչվելը, այն անվանվել է Սոթք³⁸: Այս անունը բազմիցս հիշատակված է ոչ միայն այլ պատմիչների ու «Աշխարհացոյց»-ի մեջ, այլև վիճագիր արձանագրություններում: Իսկ Բասարգեչար անվանումը, թերևս, Ռ. Մեհթիևի քոչվորական մախնիներին բնորոշ ավագակային մտածելակերպի վկայությունն է. ինչպես մտածել են, այնպես էլ՝ վերանվանել: Հեղինակը զիտակցաբար լռում է այն մասին, որ **Չալալօղլու** կոչվելուց առաջ ներկայիս Ստեփանավան քաղաքը անվանվել է Լոռէ կամ Լոռի: Այսօր **Ղարաքիլիսան** կոչվում է Վանաձոր, իսկ Ղարաքիլիսայից առաջ այն կոչվել է Տանձուտ: Մի՞թե Ռ. Մեհթիևին թվում է, թե **Արագած** լեռը, որի

34 Տե՛ս «Ashkharhatsoys (Asharhac'oyc), with an untrouction by Robert H. Hensen», New York, 1994, p. 33: Պրոֆ. դոկտ. Ա.Գ. Աբրահամյան, Անանիա Շիրակացու մատենագիտությունը, Եր., 1944, էջ 350:

35 Տե՛ս Հայաստանի և հարակից շրջանների տեղանունների բառարան, հատ. Ե, Եր., 2001, էջ 319: Ժե դարի հայերեն ձեռագիր հիշատակարաններ, կազմեց՝ Լ.Ս. Խաչիկյանը, հատ. Բ, Եր., 1955, էջ 24:

36 Ստեփանոս Օրբելյան, Պատմութիւն մահանգին Սիսական, Տփղիս, 1910, էջ 12:

37 Տե՛ս <http://www.Trend.az>, 29.10.2010, c.12.

38 Տե՛ս Ստեփանոս Օրբելյան, անդ, էջ 12, 173, 272, 514:

գրավոր հիշատակությունները սկսվում են հայ մատենագիտության մեջ V դարից, կոչվել է Ալագոյոզ. ժողովուրդն ասում է. «Փշի՛ր, փշի՛ր, բայց չափն իմացի՛ր»: Ի գիտություն հեղինակի՝ **Սևանա լիճը** վաղնջական ժամանակներից հայտնի է ոչ միայն Սևան, այլև **Գեղամա ծովակ, Գեղարքունյաց ծով, Լիխնիտիս** անուններով, իսկ լիճը՝ Գյոքչա, այսինքն՝ կապույտ ջուր, անվանել են երկիր ներխուժած քոչվոր քյուրքախոս ցեղերը:

Պարո՛ն Ռ. Մեհթիև, տեղեկացնում են, որ Արփաչայ անունը բոլորովին նոր անուն է, իսկ **Ախուրյան** անունը հիշատակվում է դեռևս սեպագրական շրջանից: Բայց ո՛չ, այս ամենը զավեշտ է, եթե համեմատենք հեղինակի այն մտքի հետ, թե իբր՝ **Էջմիածին** անունը սկզբնապես եղել է **Ուչ-Մուաձին**: Էջմիածին անունը հիշատակվում է 4-րդ դարի սկզբներից և նշանակում է «**իջավ միածինը**»³⁹: Մի՞թե 4-րդ դարի սկզբներին հիմնված **Հայաստանի Մայր եկեղեցին** կարող էր կոչվել Ուչ-Մուաձին, երբ «**Ուչ**»-ի կրողները դեռևս թափառում էին Աթայի կողմերում, իսկ արաբները դեռ չէին հայտնվել քաղաքական ասպարեզում, որ հայերը նրանցից փոխառնեին «**Մուաձին**» բառը: Չեզ մի՛ դրեք հիմար կացության մեջ, պարո՛ն Ռ. Մեհթիև, բացահայտելով ձեր և ձեր յուրայինների **անգրագիտությունը**:

4. Ալբանական մտավարժանքների շարունակությունը

Այժմ անդրադառնանք Աղվանքի շուրջ իրականացվող աղբբեջանական աճապարարություններին⁴⁰: Պարո՛ն Ռ. Մեհթիև, բոլորովին էլ պետք չէ հիմնվել Բ. Իշխանյանի, Հ. Օրբելու և կամ այդ հարցից ընդհանրապես անտեղյակ Ռ. Սյունու վրա: **Ազգությամբ հայ ուսումնասիրողները նույնպես կարող են սխալվել**: Ամենայն պատասխանատվությամբ հայտարարում են, որ նշված հարցերը սխալ է մեկնաբանել նաև ակադ. Ս. Երեմյանը: Եվ ամենակարևորը, ինչպես արդեն վերը նշեցինք, Աղվանքը կամ Ալբանիան սովորական աշխարհագրական հասկացություն է՝ համագոր Գուգարքին, Վասպուրականին, Ծոփքին և այլն: Եվ պատահական չէ, որ հաճախ այս կամ այն պատմիչի մոտ կամ վիճակի արձանագրություններում զուգահեռաբար նշվում է ոչ միայն որևէ անձնավորության **Աղվանքից լինելու, այլև ազգությամբ հայ լինելու փաստը**:

Երևում է, որ Ռ. Մեհթիևին շատ են հետաքրքրում այսպես կոչված՝ Կովկասյան ալբանները, ուստի հայտարարում է, թե մինչև Լեռնային Ղարաբաղի հետ կապված հայ-աղբբեջանական բախումը հայ պատմաբաններն առանձնապես չէին վիճարկում Արցախի՝ Կովկասյան Ալբանիայի կազմում լինելը և այդ երկրամասում ալբանական բնակչության առկայության փաստը: Եվ իբրև թե՝ հայ պատմաբանները փորձել են մերժել Կովկասյան Ալբանիայի գոյությունը անտիկ և վաղ միջնադարյան շրջանում, բայց ակամա ընդունելով այն՝ Հայաստանի և Ալբանիայի միջև սահմանները անց են կացրել Կուր գետով: Եվ պետք է ենթադրել, որ եթե հայկական հավակնությունները տարածվեին մինչև Ապշերոն, ապա Կովկասյան Ալբանիան ստիպված կլիներ տեղափոխվել Կասպից ծովի մյուս ափը: Եվ այսպիսի «փաստարկներով» ասվում է, թե առավել խենթ հայ պատմաբանները այսօր անգամ չեն դադարում բարձրաձայնել «հայկական Բակուրակերտի» մասին:

39 Տե՛ս Հայաստանի և հարակից շրջանների տեղանունների բառարան, հատ. ք., եր., 1988, էջ 349-353: 40 Տե՛ս <http://www.Trend.az>, 29. 10. 2010.

Հեղինակն անհեթեթության մեջ մեղադրելով հայ պատմագիտությունը՝ անհեթեթության մեջ հայտնվում է հենց ինքը: Հետաքրքիր է՝ այդ ի՞նչ Բակուրակերտի մասին է ճամարտակում Ռ. Մեհթիկը, երբ այդպիսի հարցադրում առաջ չի քաշվել հայագիտության մեջ, ուստի պատահական չէ, որ հեղինակը որևէ ազգանուն չի հիշում: Եղել է փորձ Բագավանը տեղադրելու Բաքու քաղաքի շրջանում, սակայն այդ տեսակետը վաղուց մերժված է, քանի որ Աթշի-Բագավան գավառը տեղադրվում է հետագայի Բաջարվան բնակավայրի շրջանում⁴¹: Իսկ որ երկու պետությունների՝ Մեծ Հայքի ու Աղվանքի միջև սահմանն անցել է Կուր գետով, հավաստում են բազմաթիվ աղբյուրներ: Ստրաբոնի հաղորդման մասին արդեն նշել ենք: Այժմ բերենք Պլինիոս Ավագի և Կլավդիոս Պտղոմեոսի տեղեկությունները: Այսպես, Պլինիոս Ավագի համաձայն՝ «Մեծ Հայքը ... լայնությամբ տարածվում է ձախից Արաքսի վրայով մինչև Կյուրոս (իմա՝ Կուր- Բ. Հ.) գետը»⁴²: Հետաքրքիր են Կլավդիոս Պտղոմեոսի տեղեկությունները: Համաձայն նրա առաջին հաղորդման՝ Ալբանիան հյուսիսից սահմանակից է Սարմատիայի նշված մասին (գիրք V, գլ. 9, 7), արևմուտքից՝ Իբերիային՝ հիշատակված գծով, հարավից՝ Մեծ Հայքի այն մասին, որն ընկած է Իբերիայի հետ նրա ունեցած սահմանից մինչև Հյուրկանյան (իմա՝ Վրկանից-Հ. Բ.) ծով Կյուրոս գետի գետաբերանը ...»⁴³: Իսկ Մեծ Հայքի նկարագրության մեջ նույն հեղինակը գրում է. «Մեծ Հայքը հյուսիսից սահմանակից է Կողքիսի մի մասին, Իբերիային, Ալբանիային Կյուրոս գետով անցնող գծով...

Արևելքից՝ Հյուրկանյան ծովի (իմա՝ Վրկանից- Բ.Հ.) այն մասին, որ Կյուրա գետի գետաբերանից հասնում է մինչև 79° 45' 43" 20' չափումներն ունեցող սահմանը (որի և Կյուրոս գետի գետաբերանի միջև գտնվում է նաև Արաքս գետի գետաբերանը 79° 45' 43" 50') և Մարաստանին (Մեդիային – Բ.Հ.) այդտեղից դեպի Կասիոս լեռը ձգվող գծով, որի ծայրերն ունեն 79° 42' 30' և 80° 30' 39' 40' չափերը»⁴⁴: Թերևս մտածելով, որ 21-րդ դարում կգտնվեն անձինք, որոնք կփորձեն կասկածի տակ առնել իր տեղեկությունները, նա մի անգամ ևս նշում է. «Հայաստանի Եփրատ, Կյուրոս և Արաքս գետերի միջև ընկած հատվածի ստրատեգիաներն են Մոսքական լեռների մոտ՝ Կատարգենեն Բոքաս կոչեյալներից վերև, Կյուրոս գետի մոտ՝ Տոսարենեն (իմա՝ Գուգարք – Հ. Բ.) և Օտենեն, Արաքս գետի մոտ՝ Կոլթենեն (իմա՝ Կասպիենեն - Բ.Հ.), իսկ նրանից ներքև՝ Սոդուկենեն, Պարյուաղրես լեռան մոտ՝ Սիրակենեն (իմա՝ Սիսական – Բ.Հ.) և Սակասենեն (իմա՝ Շակաշեն կամ Գարդմանացիք – Բ.Հ.)»⁴⁵:

Եվ քանի որ Ռ. Մեհթիկը շատ է վատահում ակադ. Ս. Երեմյանին, ապա խորհուրդ ենք տալիս ծանոթանալ վերջինիս «Մեծ Հայք» հոդվածին, որը տեղ է գտել նրա «Հայաստանը ըստ «Աշխարհացոյց»-ի» աշխատությունում և, որքան էլ «ցավալի» լինի, հերքում է Ռ. Մեհթիկի անհեթեթությունները: Մենք միանգամայն նպատակադիր մեջ բերեցինք սկզբնաղբյուրների տեղեկությունները և անգամ խուսափեցինք դիմել հայկական աղբյուրներին, մասնավորապես «Աշխարհացոյց»-ին, ուստի պարզապես անհեթեթ է, երբ սկզբնաղբյուրները

41 Տե՛ս Ս. Երեմյան, Գայաստանը ըստ «Աշխարհացոյց»-ի, էջ 42:

42 Pliny, Natural History, London, 1950, VI, 9, 25:

43 Claudii Ptolemaei Geographia, E codicibus recognovit, prolegomenis, annotatione indicibus tabulis instruxit carolus Muellerus voluminis Primi, Parisiis, 1901, գիրք V, 1:

44 Claudii Ptolemaei Geographia, գիրք V, գլուխ 12, 1, 3:

45 Անդ, գիրք V, գլ. 12, 8:

դնելով մի կողմ՝ Ռ. Մեհթիևը դիմում է Ս. Ե. Կրիմսկու, Ն. Յա. Մառի արտահայտած այս կամ այն կարծիքին:

Հեղինակի և շատ ուսումնասիրողների կողմից արբանական պետության ստեղծումը դրվում է մ. թ. ա. IV-III դդ. և որպես հիմնավորում բերվում է մ. թ. II դարի հեղինակ Արիանոս Ֆլավիոսի «Ալեքսանդրի արշավանքը» աշխատությունը: Լավ է, որ Ռ. Մեհթիևը ծանոթ է հիշյալ աշխատությանը, սակայն, այնուամենայնիվ, լավ կլիներ, որ ծանոթանար նաև Կուրտիոս Ռուփոսի «Historiarum Alexandri regis Macedonum libri quae supersunt» (Մոսկվա 1903) աշխատությանը: Եվ ի՞նչ: Պարզվում է, որ Կուրտիոս Ռուփոսը, որն իր աշխատությունը գրել է մ.թ. I դարում, բացարձակապես գաղափար չունի մ.թ.ա. 331թ. Գավգամելայի ճակատամարտում արբանների մասնակցության մասին: Այստեղ արբաններին փոխարինում են մասազետները, ինչը շատ կարևոր է: Իրականությունն այն է, որ Արիանոսը՝ ելնելով այն իրողությունից, որ Ալբանիա են ներխուժել մասազետները կամ հայկական աղբյուրների մագքութները, մասազետներին փոխարինել է արբաններով: Համենայն դեպս, Ստրաբոնի հաղորդումներից, ինչպես նաև Մովսես Խորենացու տեղեկություններից դժվար չէ եզրակացնել, որ Ռ. Մեհթիևի «ավտոխթոն» արբանները ընդամենը՝ եկվոր ցեղեր էին, որոնք ներխուժել էին Այսրկովկաս, անկասկած, Հյուսիսային Կովկասից և իրենց պետությունը հիմնել էին կամ մ.թ.ա. II դարի վերջին, կամ I դարի սկզբին⁴⁶:

Հարևանների հարստությունը թալանելու՝ քոչվորներին հատուկ սովորության նմանողությամբ Ռ. Մեհթիևը Մովսես Կաղանկատվացուն համարում է ավան պատմիչ և հայտարարում, որ նա իբր՝ հաստատում է Մովսես Խորենացու հաղորդած տեղեկությունները: Մինչդեռ, հպանցիկ քննությունն անգամ ցույց է տալիս, որ Կաղանկատվացին պարզապես ամբողջությամբ հետևում է Պատմահոր «Հայոց Պատմությանը»: Հեղինակը փորձում է հայոց թագավոր Վաղարշակին (նրա մոտ՝ պարթևական թագավոր-Բ.Հ.) նույնացնել պարթևական Վաղարշ Բ-ի (51/52-79/80) հետ, որը Առանին նշանակել է Աղվանքի կուսակալ, և քանի որ վերջինիս կուսակալությանն է հանձնվել Կուրի և Երասխի միջագետքը, որի մեջ մտել են Ղարաբաղի «պատմական» հողերը՝ Օրքիստենեն (Արցախը), Ծավղեքը, Ուտիքը և մասամբ՝ Արաքսենեն, հետևաբար Աղվանքի սահմանը հարավում հանդիսացել է Երասխ (հեղինակի մոտ՝ Արագ-Բ.Հ.) գետը⁴⁷:

Հարց է ծագում, եթե հեղինակն այդպես՝ Պատմահոր միջոցով, փորձում է Կովկասյան Ալբանիայի մաս հռչակել Կուրի և Երասխի միջագետքը, ապա ինչու՞ է մոռանում, որ Պատմահայրը ոչինչ չի ասում Կուրի ձախափնյակի մասին և Առանին համարում է Հայկյան Միսակի սերնդից⁴⁸: Չէ ո՞ր ըստ Մովսես Խորենացու՝ Հայոց Արևելից կողմերն Աղվանք անունն են ստացել ընդամենը դաշտի արգավանդության պատճառով, իսկ Կուրի ձախափնյակին Աղվանք կամ Ալբանիա անունը տվել են հայերը՝ ելնելով այն իրողությունից, որ արգավանդ դաշտի շարունակությունը կազմում է հարթավայրի հյուսիսային հատվածը, հետևաբար՝ հարևան պետությունն ընդամենը Ալբանիա է կամ Աղվանք, այլ խոսքով՝ արգավանդ դաշտի երկիր: Այս ամենին անտեղյակ Ռ. Մեհթիևը մանրամասները կարող է կարդալ մեր հոդվածներում⁴⁹:

46 Տե՛ս The Geography of Strabon, XI, IV, 5: Մովսես Խորենացի, Պատմութիւն Հայոց, գիրք Բ, գլուխ 2:

47 Տե՛ս <http://www.Trend.az>, 29.10.2010, c. 14-15.

48 Տե՛ս Մովսես Խորենացի, Պատմութիւն Հայոց, գիրք Բ, գլ. Ը:

49 Տե՛ս Բաբկեն Հարությունյան, Արցախի, Հայոց Արևելից կողմերի և Ղարաբաղի հարցի շուրջ.

Երբ մարդը ծանոթ չէ Հայոց պատմությանը, ապա ամեն ինչ կարող է հորինել: Այդ ի՞նչ աղվանական ցեղերի մասին կարող է խոսք գնալ, երբ Ծավդեք անունը, ինչպես Մովսես Խորենացին է նշում, կաղմեացիների անվանումն է, որոնց բերեցին Հայոց Արևելից կողմեր՝ հանձնելով դրանց մի հատվածի կառավարությունը⁵⁰: Ուտիքի մասին խոսքն անգամ անիմաստ է, քանի որ այն ծագում է հայերեն «հովիտներ» բառից: Հայոց Պատմահոր մոտ դարերի ընթացքում կատարված արտագրությունների հետևանքով տեղ են գտել աղավաղումներ: Այսպես, «Ի սորա զավակաց ասեն սերեալ զագգն Ուտիացոց և Գարդմանացոց և Ծաղեացոց և Գուգարացոց իշխանութիւնսն»⁵¹ հատվածում «Գարդմանացոցը» թյուրիմացության հետևանքով է հայտնվել Առանի սերունդների շարքում, ինչը պարզորոշ ցույց է տալիս Կլավդիոս Պտղոմեոսի «Աշխարհագրություն»-ը, որտեղ Հայոց Արևելից կողմերում հիշատակվում են միայն Սակասենե-Գարդմանացիքը, Սողուկենե-Ծավդեացիքը, Օտենե-Ուտիքը⁵²:

Ստրաբոնի ժամանակներում զարդմանացիները բնակվել են Հյուսիսային Կովկասում և միայն մ.թ. I դարում են մուտք գործել Արևելյան Այսրկովկաս: Իսկ երբ Այսրկովկաս ներխուժեցին մասագետները կամ մագքութները, նրանք ստիպված եղան քաշվել դեպի Շաքի-Նուխիի շրջանը, ինչպես արձանագրում է Վարդան Արևելցու «Աշխարհագրութիւն»-ը. «Գարգարացիք Շաքի է»⁵³:

Ընդհանրապես գեղեցիկ չէ, երբ պատմիչին վերագրում են մտքեր, որոնք նրա աշխատության մեջ տեղ չեն գտել: Անհեթեթություն է հայտարարել, թե իբր՝ Մովսես Խորենացին հավաստում է Փայտակարան աշխարհի աղվանական բնակչության մասին: Մինչդեռ, Ռ. Մեհթիսի հիշատակած հատվածում ասվում է. «Տրդատը... առաքել բազում համարձակութեամբ, հանդերձ Սանատրուկ ոմամբ յիւրմէ ազգէն Արշակունեաց:

Որոյ երթեալ՝ լինէր օրինակ բարի, հայրենականօքն այլ կուսութեամբ գեր ի վերայ քան զհարսն, և պատժականաւ զոյգ ընդ թագաւորին: Իսկ ի հասանել համբաւոյ վախճանին Տրդատայ, ի դաւելոյ նորին Սանատրկոյ և այլոց ոմանց հանապազատուտ արանց Աղուանից՝ սպանին զերանելին, ընթագրեալ ձիովք, բարբարոսքն ի Վատնեան դաշտին, մերձ ի Կասբիականն կոչեցեալ ծով... Իսկ Սանատրկոյ թագ կապեալ ինքեան՝ ունի զքաղաքն Փայտակարան. զօրութեամբ օտար ազգաց խորհէր տիրել բոլորումս Հայոց»⁵⁴:

Պատմահայրը պարզ հավաստում է, որ Սանատրուկը հայ Արշակունի էր և կառավարիչ նշանակվելով Փայտակարանում՝ Տրդատի մահից հետո փորձում էր օտար ազգերի միջոցով տիրել հայոց գահին: Կուրից հյուսիս գտնվում էր այսպես կոչված՝ Աղվանքը, որը Փավստոս Բուզանդը նույնացնում է Մագքթաց թագավորությանը: Սանատրուկը փորձել է տիրել թագավորական իշխանությանը՝ հենվելով Մագքթական կամ «Յանավազատուտ արանց Աղուանից» ուժերի վրա: Ուրեմն՝ ի՞նչ աղվանից բնակչության մասին կարող է խոսք լինել այս երկրամասում, երբ Ստրաբոնը հայտնում է, որ նշված տարածքում բնակվում են քիչ քա-

ՊԲՀ, 1994, N 1-2, էջ 256-266, 1995, N 1, և Մեծ Հայքի թագավորության հյուսիս-արևելյան մարզերի վարչաքաղաքական կազմությունը 387-451 թթ., «Բանբեր Երևանի համալսարանի», 1976, N 25:

50 Տե՛ս անդ:

51 Անդ:

52 Տե՛ս Claudii Ptolemai Geographia, V, XII, 8.

53 «Աշխարհացոյց Վարդանայ վարդապետի», Բարիզ, 1960, էջ 10:

54 Մովսես Խորենացի, գիրք 9, գլ. 9:

նակությամբ աղվաններ և հայեր⁵⁵:

Ինչ վերաբերում է Չարլզ Դոուսեթի հայտարարությանը, թե Թովմա Արծրունին հիշում է երեք աղվան իշխանի⁵⁶, ապա նրանք Հայաստանի Աղվանից կոչված երկրամասի իշխաններն էին և ազգությամբ հայ, ուստի ավելորդ է անգամ դրան անդրադառնալը: Արաբական աղբյուրները հստակ արձանագրում են նրանց՝ հայ պատրիկներ լինելը:

Այդ ամենին հետևում է ցնցող հայտարարություն, թե իբր՝ Ալբանական քազավորության անկումից հետո Ղարաբաղը, լինելով Ադրբեջան աշխարհագրական և քաղաքական միավորի մասը (?), մտել է ադրբեջանական Սաջիդների կամ Սաջյանների պետության մեջ, X դ. մաս է կազմել Սալարյանների պետության, XI-XII դդ. եղել է Շադդադյանների պետության կազմում, XII-XIII դդ. մաս է կազմել Ելտկուզյանների ադրբեջանական պետության: Ինչպես նշեցինք՝ Ռ. Սեֆինը նաև Սեֆյանների պետությունն է համարում թյուրքական, որի մեջ մտել է Ղարաբաղը: Եվ վերջապես, XVIII դարի երկրորդ կեսին Ղարաբաղը հայտնվում է Ղարաբաղի խանության մեջ, իսկ 1805 թ. միացվում Ռուսական կայսրությանը⁵⁷:

Ի՞նչ կարող ես ասել. պարզապես ցատկերի միջոցով ստեղծվող կեղծիքների մի ծաղկաբույլ է: Սկսենք այն բանից, որ **Սաջյանների և Սալարյանների պետությունները եղել են իրանական տարրի պետական կազմավորումներ: Շադդադյանները քուրդ էին**, և պարզապես ծիծաղելի է խոսել ադրբեջանական պետության մասին: Եթե անգամ Հայոց Արևելից կողմերը կամ Ղարաբաղը մաս են կազմել Ելտկուզյանների պետության, ապա այդ լույն նշանակում է, որ վերջինս ժամանակավորապես ուժով տիրել է հայկական երկրամասին: Ինչքան էլ բարձր գոռան ադրբեջանական պատմաբանները, **Սեֆյան Պարսկաստանը պարսկական պետություն է:** Հեղինակը գրում է նրանում առկա Ղարաբաղի խանության մասին, բայց ինչու՞ չի հիշատակում, թե ինչպես Արցախ-Ղարաբաղի հայությունը XVIII դ. 20-ական թթ. ապստամբեց և փորձ արեց վերականգնել հայկական պետականությունը: Ինչու՞ ոչինչ չի ասում այն մասին, որ Նադիր շահը ստեղծեց Խամսայի հայկական մեխիթրությունների միությունը, որը կիսանկախ պետություն էր՝ Պարսից տերության մեջ:

Անշուշտ, ոմանք կարող են ինձ ընդհատել՝ նշելով, որ այս ամբողջ բանավեճը, ըստ էության, առանձնապես կարևոր չէ, քանի որ ինչքան **շների** նախահայրերը կարող են լինել **կատունները**, այնպես էլ **ադրբեջանցիների** նախնիները կարող են լինել **ալբան-աղվանները**: Եվ եթե աղվաններն ապրել են Կուրի ձախափնյակում, ապա դա որևէ կերպ այդ երկրամասը չի դարձնում ադրբեջանցիների հայրենիք՝ պատմական առումով:

Այնուամենայնիվ, մի քանի խոսք այսպես կոչված՝ աղվանների մասին: Ուսումնասիրողները Ստրաբոնի հիշատակած աղվանական 26 ցեղերի մեջ են մտցնում գարգարներին, ուղիններին, կասպերին և այլն: Կասպերն անվերապահորեն իրանական ցեղ էին, իսկ գարգարները և ուղինները Ստրաբոնի ժամանակներում չէին էլ մտնում հիշյալ ցեղերի մեջ, քանի որ բնակվում էին Հյուսիսային Կովկասում: Չի բացառվում, որ այդ հեռավոր ժամանակներում

55 Տե՛ս Strabo, XI, VII, 1: «Փավստոսի Բիզանդացույ Պատմութիւն Հայոց», Վենետիկ, 1832, դպր. Գ, գլ. Ե: «...Աղուանից, այս ինքն սահմանացն Մագքթաց»:
56 Տե՛ս <http://www.Trend.az>, 29.10.2010.
57 Տե՛ս նույն տեղում:

Աղվանքի բնակչությունն առավելապես իրանական էր: Կովկասյան ցեղերի մուտքը Կուրի ձախափնյակ տեղի ունեցավ ալանների՝ Հյուսիսային Կովկասում հայտնվելու ժամանակ, երբ մի շարք կովկասալեզու ցեղեր, մասնավորապես գարգարները և ուղիները ալանների ճնշման տակ ներխուժեցին Այսրկովկաս և բնակություն հաստատեցին Կուրի ձախափնյակում: Ինչպես Չինաստանը իրականում երբեք չի կրել ռուսական «Китай» անվանումը, այնպես էլ Կուրի ձախափնյակում ստեղծված պետությունը երբեք չի կոչվել ո՛չ Ալբանիա և ո՛չ Աղվանք: **Այդպես նրանց կոչել են միայն հայերը, այն էլ զուտ աշխարհագրական առումով՝ որպես արգավանդ դաշտի երկիր:** Ինչպես տեսանք, աղվանները բոլորովին էլ ավտոխթոն չեն, այլ եկվոր տարր, ինչպես նշում է Հայոց Պատմահայրը: Բոլորովին էլ պատահական չէ, որ այսպես կոչված Ալբանական կամ Աղվանից պետության անկումից հետո այդպես էլ միասնական էթնոսի չվերածված Կուրի ձախափնյակի ցեղերից և ոչ մեկը չպահպանեց «ալբան» կամ «աղուան» անունը: Նրանց ցեղային կյանքը շարունակվեց բավական երկար ժամանակ, երբ արաբների կողմից պարտադրված մահմեդականության ազդեցությամբ մեծ մասը ձուլվեց եկվորներին:

Սա է իրական ճշմարտությունը, սակայն մի պահ՝ զուտ հիպոթետիկ կերպով, ընդունենք, որ ճիշտ է աղբբեջանական պատմագիտությունը, երբ ալբանական է հռչակում Հայոց Արևելից կողմերի բնակչությանը: Իսկ ո՞վ ասաց, որ այդ ցեղերին իրենց մեջ լուծելու հարցում հայերը որևէ իրավունք չունեին, և դա միայն արաբների, իսկ հետագայում՝ եկվոր թյուրքական ցեղերի անկապտելի իրավունքն էր: Եվ այդ ինչպե՞ս է, որ «ալբանների սերունդներ հանդիսացող» Արցախ-Ղարաբաղի ազգաբնակչությունն **իբրև հայ** կենաց-մահու պայքար էր մղում պարսից (5-րդ դար), արաբական(7-9 դարեր) և ապա՝ թյուրքական ցեղերի տիրապետության դեմ:

Ռ. Մեհթիսը գտնում է, որ Աղբբեջանի քրիստոնեական հուշարձանները միշտ եղել են հայոց պետականության կողմից կեղծարարության առարկա⁵⁸: Այս հիմնարկությանը պատասխանելու կարիք անգամ չկա, քանզի «Աղվանից եկեղեցի» անվանումն առաջացել է պատմական անցքերի պատճառով, երբ հայոց եկեղեցու թեմերը Ռ-անի կամ Առանի մարզպանության ստեղծումից հետո 5-րդ դարում, հոգևոր-վարչական առումով ստիպված էին մտնել նոր կառույցի մեջ: Չնայած Աղվանից անվանմանը՝ այն պարզապես Հայոց եկեղեցու մի մասն էր, և եթե տվյալ կաթողիկոսությունը հատուկ անջատողական ձգտումներ էր հանդես բերում, ապա դրանք անմիջապես սաստվում էին հայոց եկեղեցու կողմից: Ավելին՝ գտնվելով օտար տիրապետողների լծի տակ՝ հայոց եկեղեցին ծանր ժամանակաշրջաններ է ապրել, իսկ մի պահ հայ կաթողիկոսությունների թիվը հասել է 6-ի: Դրա արդյունքն են Կիլիկիայի, Աղթամարի կաթողիկոսությունների հանդես գալը, բայց սա ամենևին էլ չի նշանակում, թե դրանք օտար տարրերի եկեղեցիներ էին:

Աղվանական արձանագրությունները հայերի կողմից ոչնչացնելու հեքիաթը պատմեք Ձեր երեխաներին, պարո՛ն Մեհթիս: Մեկ ուրիշ տիպի հեքիաթ էլ է հորինվել՝ հայերի կողմից իբր՝ աղբբեջանական հուշարձանները ոչնչացնելու մասին⁵⁹:

58 Տե՛ս <http://www.Trend.az>, 29.10.2010, с. 17-18.

59 Տե՛ս նույն տեղում:

Եթե Ռ. Մեհթիկը կամենում է, ապա կարող է ցույց տալ հայկական մշակութային կոթողները բարբարոսաբար ոչնչացողների հասցեն: Աղբբեջանի պետական այրեր, կարո՞ղ եք ասել, թե ուր են անհետացել այսօր Նախիջևանի Ինքնավար Հանրապետության մեջ գտնվող Ջուղայի հազարավոր հայկական խաչքարերը: Կամ ինչու՞ են անհետացել Նախիջևանի երկրամասի հայկական եկեղեցիներն ու մշակութային այլ արժեքները:

Պարոն Ռ. Մեհթիկ, մեկընդմիջտ ընդունեք, որ ոչ Մովսես Կաղանկատվացին է աղվան հեղինակ և ոչ էլ Կիրակոս Գ-անձակեցին, և Հայոց Արևելից կողմերի իշխանները կարող են համարվել Աղվանից երկրամասից, որովհետև ազգությամբ հայ են: Գանձասարի եկեղեցին էլ և մյուս քրիստոնեական եկեղեցիներն ու մատուռները Կուրի և Երասխի միջագետքում ստեղծվել են հայերի կողմից և հայոց մշակութային գանձերի մի մասն են:

Ի դեպ՝ 72 առաքյալներից Եղիշեն⁶⁰ ոչ՝ հայ է և ոչ՝ էլ՝ աղվան: Նա քարոզել է Հայոց Արևելից կողմերում, որի Աղվանից դաշտը՝ իր լեռնակողմով, ընդամենը Հայաստանի մի մասն էր: Ավելացնենք նաև, որ հայերը ռեստավրացիայի անվան տակ տվյալ տարածաշրջանի ոչ մի վանք և եկեղեցի չեն ոչնչացրել, քանի որ դրանք ի սկզբանե անտի հայկական են: Եվ շատ զարմանալի է, որ այդ հարցն այդպես հետաքրքում է մահմեդական աղբբեջանցիներին, որոնք հաճույքով միշտ էլ ոչնչացրել են քրիստոնեական կոթողները, իսկ Արցախում անգամ հողով էին ծածկել մի հայկական եկեղեցի:

Այժմ մոտենում ենք Ռ. Մեհթիկի կեղծարարություններից ամենագարմանալիին: Ըստ նրա՝ ստացվում է, որ մինչև XV դարի կեսերը Հարավային Կովկասում հայեր համարյա թե չեն ապրել և միայն 1441 թվից, երբ Ջահան շահը կաթողիկոսությունը Կիլիկիայի Սիս քաղաքից տեղափոխեց, իբր՝ այդ ժամանակ ամբողջությամբ թուրքաբնակ Իրիվանի (իմա՝ Երևան-Բ.Հ.) մասը կազմող **Ուչ-Քիլիսայի** կամ **Ուչ-Մուսահինի** վանքը, որը հնում իբր՝ եղել է ալբանական վանք, հայ քարոզիչները գալիս են այս երկրամասերը և տարածում քրիստոնեություն: Եվ որ իբր, մինչև XIX դարի առաջին կեսը հայերը Արևմտյան Անդրկովկասում շատ չնչին են եղել⁶¹:

Ինչպե՞ս որակես այս ամենը: Մեր կարծիքով, սա **պետական աստիճանի բարձրացված խուլիզանություն է**: Ամենազգվելին այն է, որ Ռ. Մեհթիկը շատ լավ գիտի, որ անամոթաբար կեղծում է պատմությունը, սակայն դա նրան բոլորովին չի անհանգստացնում:

Հեղինակի ընդամենը մի քանի տողերի մեջ բազմաթիվ անճշտություններ և կեղծիքներ են տեղ գտել: Նախ՝ Ջահան շահը թյուրք-աղբբեջանական պետության թագավորը չէր, այլ, անշուշտ, թուրքմենական ծագումով կարա-կոյունլուների: Եվ նա չէ, որ կաթողիկոսությունը Կիլիկիայի Սիս քաղաքից տեղափոխել է Էջմիածին, այլապես Կիլիկիայի կաթողիկոսությունը կդադարեր գոյատևել: Չմոռանանք, որ Կիլիկիան այդ շրջանում գտնվում էր Եգիպտոսի Մամլուքյան պետության կազմում, և Ջահան շահը այդ երկրամասի նկատմամբ ոչ մի իշխանություն չուներ: Խնդիրը միանգամայն այլ էր: Կիլիկիայի Հայկական պետության անկումից հետո էլ Կիլիկիայի կաթողիկոսությունում շատ ուժեղ էին արևմտամետ միտումները, և հայ հոգևորականությունը կամենում էր Հայոց կաթողիկոսությունը տեղափոխել

60 Տես նույն տեղում, էջ 19-20:

61 Տես նույն տեղում:

հայկական ստվար բնակչություն ունեցող բուն Հայաստան: Ձահան շահը ընդառաջ գնաց հայերի ձգտումներին և հայ հոգևորականները 1441 թվին, իրենց ձեռքում ունենալով Գրիգոր Լուսավորչի աջը, Կիրակոս Վիրաբեցուն ձեռնադրեցին Ամենայն հայոց կաթողիկոս, և կրկին հայոց կաթողիկոսությունը հաստատվեց Էջմիածնում, որտեղ էլ ծնունդ էր առել 4-րդ դարում:

Ռ. Մեհթիկը կարող էր և չնչել Հ. Փափագյանի հրատարակած «Персидские указы Матенадарана» («Մատենադարանի պարսկական հրամանագրերը») փաստաթղթերի ժողովածուն, քանի որ ոչ ոք չի պատրաստվում կասկածի տակ առնել այն իրողությունը, որ Վաղարշապատ գյուղը և Էջմիածնի վանքը մահմեդական այլազգիները կոչել են Ուշ-քիլիսա: Դրա մեջ զարմանալու ոչինչ չկա, քանի որ օտար տիրապետողներն իրենք են որոշում, ինչպես կոչել այս կամ այն բնակավայրը կամ վանքը: Հեռու չգնանք. Բարձր Հայքի կենտրոնը հայերն անվանել են Կարին, իսկ թուրքերը՝ Էրզրում, հայերը՝ Մեքաստիա, իսկ թուրքերը՝ Սվազ և այլն: Այլ խնդիր է, թե ինչու՞ են մահմեդական այլազգիները Էջմիածինը կոչել Ուշ-քիլիսա: Հարկ է նշել, որ սկզբում Ուշ-քիլիսա կոչվել է Վաղարշապատ գյուղը, քանի որ այնտեղ էին գտնվում Սբ. Հռիփսիմեի, Սբ. Գայանեի և Սբ. Շողակաթի վանքերը, և քանի որ Վաղարշապատը մեծ բնակավայր չէր, և հաճախ վանքի՝ Մայր Աթոռի անունով կոչվում էր Էջմիածին, այլազգիների կողմից Ուշ-քիլիսա անունը տեղափոխվեց վանքի վրա: Հիմարություն է կարծել, որ հայերը Ուշ-Մուսաձինը վերածել են Էջմիածնի: Դրա համար հարկ է, որ Ռ. Մեհթիկը մինչև թյուրքական ցեղերի հայտնվելը՝ XI դարից առաջ, Առաջավոր Ասիայում ցույց տա Ուշ-քիլիսայի հիշատակությունը կամ թեկուզ Ուշ-Մուսաձինի հիշվելը, ինչը նա երբեք չի կարող անել:

Ռ. Մեհթիկը չի բավարարվում մեծան տգեղ կեղծիքով և հայտարարում է այն մասին, որ հայերը մինչև XIX դարի սկզբի գաղթը Արևելյան Հայաստանի ռուսական տիրույթներ (հեղինակի մոտ՝ Հարավային Կովկաս- Բ.Հ.) շատ փոքր թիվ են կազմել այնտեղ: Իր թեզն ապացուցելու համար նա նշում է, որ հայերը եկել էին Բալկաններից և ապրում էին Վանա լճի շրջակայքում, իսկ Հարավային Կովկասում մինչև նրանց գաղթը գերակշռել է տեղական թյուրքական բնակչությունը: Հայերի «եկվորությունը» հաստատելու համար նա հենվում է Հերոդոտոսի տեղեկությունների վրա, որոնց սխալ ընկալումը վաղուց է ցույց տրված պատմագիտության մեջ: Ինչպես միշտ, այս դեպքում ևս նա վկայում է սկադ. Մ.Գ. Ներսիսյանի խմբագրությամբ լույս տեսած «История армянского народа» (Երևան, 1980), Ա. Փաստրմաճյանի «Histoire de l'Arménie» (Paris 1999), Ի.Ի. Դյակոնովի «К предистории армянского языка» (ՊԲՀ, թիվ 4, 1983) աշխատությունները, ինչը, նրա կարծիքով, ընդունվում է ուսումնասիրողների մեծ մասի կողմից⁶²:

Թո՛ղ հեղինակին հայտնի լինի, որ Հերոդոտոսի տեղեկությունները վերաբերում են հայոց Արամանի թագավորից պարտություն կրած փռուզիացիներին, որոնք ստիպված եղան իրենց վրա վերցնել հայոց թագավորի անունը և դառնալ նրա ժողովուրդը: Սրանք են, որ եղել են փռուզիացիների գաղութաբնակները: Մի փոքր ավելի ուշ հարևան ժողովուրդները հայերին կոչեցին արմահիներ կամ արմենիներ՝ հայոց Արամանի թագավորի անունով, որը պահպանվել է Մովսես Խորենացու երկում՝ մի փոքր աղավաղված Արամ ձևով: Այնպես որ լավ կլինի, որ

62 Տե՛ս նույն տեղում, էջ 19-20:

աղբբեջանցիները մտածեն իրենց եկվորության մասին և չփորձեն եկվոր հայտարարել այս տարածաշրջանի տեղաբնիկ ավտոխթոն հայերին: **Ավելի քան ծիծաղելի է, երբ մ.թ.ա. 2-րդ հազարամյակին վերաբերող շատուզված տեղեկությունները համեմատության մեջ են դրվում 20-րդ դարում միայն իբրև ազգ ձևավորված Ալթայի քոչվորականների ծագումնաբանության հետ:**

Ռ. Մեիթիևին շատ է գայրացրել ՀՀ նախագահ Մերժ Սարգսյանի այն հայտարարությունը, թե Ղարաբաղի բնակչությունը դարեր շարունակ եղել է միատարր հայկական, և թյուրք-մուսուլմանական ցեղերը ներթափանցել և բնակություն են հաստատել միայն XVIII դարի երկրորդ կեսին, և նրանց թիվը անցյալ դարի սկզբներին կազմել է ընդհանուր բնակչության ընդամենը հինգ տոկոսը: Հեղինակի կարծիքով, աղբյուրներն այլ բան են ասում, որ իբր հայերն են գաղթել Ղարաբաղ: Շարունակելով իր տեսակետը՝ նա հայտարարում է, որ օսմանյան փաստաթղթերը հավաստում են միայն հայերի XVII-XIX դդ. Ղարաբաղ գաղթելու մասին, որի հետևանքով իբր փոխվել է բնակչության էթնիկ կազմը:

Իր տեսակետն ապացուցելու նպատակով նա դիմում է Ջ. Բուռնուրյանի, Սվանտե Բորնելի, Ա. Ս. Գրիբոյեդովի, Ն. Ի. Շավրովի աշխատություններին, «Акты собранные кавказской археографической комиссией» ((АКАК), VII, Тифлис, 1878, փաստաթուղթ 829) ժողովածուին և ռուս նկարիչ Վ. Ի. Մաշկովի՝ 1828 թ. հայերի գաղթը պատկերող նկարին⁶³: Իր այս «քննությունը» կատարելուց հետո նա հայտարարում է, որ ՀՀ նախագահ Մերժ Սարգսյանը «քոչվոր մուսուլմաններ» անվանումը պետք է հատկացներ հայերին և ոչ թե քոչվոր բառն օգտագործեր մահմեդականների համար:

Այլևս չխորանալով նման բարբաջանքների մեջ՝ անցնենք խնդրի պարզաբանմանը: Նախ, թող Ռ. Մեիթիևի մտքով չանցնի, որ մենք պետք է փորձենք հերքել Պարսկաստանից հայերի ներգաղթի փաստը: Իհարկե, ո՛չ: Սակայն հետաքրքիր է, թե հեղինակը իրեն հարց տվել է, թե ինչու՞ Արևելյան Հայաստանը, որ պարզապես հեղեղված է հայկական հազարավոր հուշարձաններով և հարյուրավոր եկեղեցիներով, 19-րդ դարի սկզբին ուներ մուսուլմաններին քանակապես զիջող հայկական բնակչություն: Անտարակույս, ո՛չ: Քանի որ այդ հարցին պատասխանելիս նա ծանր կացության մեջ կհայտնվեր: Խնդիրն այն է, որ դրզըրբաշական, այսպես կոչված՝ «աղբբեջանական ցեղերի» կողմից հայերի նկատմամբ 1604-1605 թթ. իրագործվել է մի խայտառակ ցեղասպանություն: Շահ Աբբասի հրամանով Հայաստանի կենտրոնական շրջանների և Արևելյան Հայաստանի բնակչության գերակշիռ մասը բռնի տեղահանվեց, այլ խոսքով՝ բռնագաղթեցվեց Պարսկաստանի խորքերը⁶⁴:

Անշուշտ, Շահ Աբբասը Պարսկաստանի թագավորն էր, որքան էլ աղբբեջանցի պատմաբանները թմբկահարեն Մեֆյանների դրզըրբաշական պետության աղբբեջանական լինելը: Սակայն հայերի նկատմամբ ցեղասպանությունն իրականացրին թյուրքական դրզըրբաշական ցեղերը: Ամենահամեստ հաշվարկներով՝ բռնագաղթեցվեց 330 հազարից ավելի հայություն, չնայած շատ ուսումնասիրողներ, իսկ պետք է ասել, որ նրանք չեն սխալվում, բռնագաղթվածների

63 Տե՛ս նույն տեղում, էջ 22-23:

64 Տե՛ս Առաքել Դավրիժեցի, Պատմութիւն, Էջմիածին, 1896: Г. Эзов, Сношение Петра Великого с армянским народом, СПб, 1898. И. П. Петрушевский, Азербайджан в XVI-XVII вв., «Сборник статей по истории Азербайджана», Баку, 1949, с 277. Հայ ժողովրդի պատմություն, հատ. IV, Եր., 1972, էջ 95-102:

իրական թիվը համարում են շուրջ կես միլիոն: Եթե անգամ վերցնենք նվազագույն քանակությունը և մեկ դարի ընթացքում բռնագաղթվածների աճը համարենք ընդամենը 100 տոկոս, ինչը շատ ցածր է իրական աճից, ապա կտեսնենք, որ հայ ժողովրդին հասցվել է զարհուրելի հարված, քանի որ 330 հազարը XVII դարի վերջին կկազմեր կամ ավելի ճիշտ կազմելու էր 660 հազար, XVIII դարի վերջին՝ 1320 հազար, XIX դարի վերջին՝ 2640 հազար, XX դարի վերջին՝ 5280 հազար, այլ խոսքով՝ ներկայումս աշխարհով մեկ սփռված հայության կեսից ավելին: Իսկ եթե բռնագաղթվածների թիվն ընդունենք կես միլիոն, ինչը համապատասխանում է իրականությանը, ապա ցածր աճի պայմաններում XVII դարի վերջին կազմելու էր 1 միլիոն, XVIII դարի վերջին՝ 2 միլիոն, XIX դարի վերջին՝ 4 միլիոն, XX դարի վերջին՝ 8 միլիոն, այսինքն՝ բռնագաղթվածների թիվն անգամ ամենացածր աճի պայմաններում XX դարի վերջին կհավասարվեր ներկայիս Ադրբեջանի Հանրապետության բնակչությանը:

Բայց մի՞թե հայկական տարրը հնարավորություն ունեցավ բնականոն ձևով աճելու: Իհարկե, ո՛չ: Սովը, ցուրտը և համաճարակները, բառիս իսկական իմաստով, հնձեցին բռնագաղթեցվածներին, և միայն խլյակները կարողացան իրենց գոյությունը պահպանել:

1828-1830 թթ. ներգաղթին մենք դեռ կանդրադառնանք, սակայն չմոռանանք, որ հայությունը էթնիկ առումով մեծ արհավիրքների ենթարկվեց նաև XVII դարից հետո: Հայկական տարրը մեծ կորուստներ ունեցավ Նադիր շահի իշխանության օրոք, և այդ կորուստների չափը դժվար է անգամ ճշտել: Սակայն, որքան էլ տարօրինակ լինի, Արևելյան Հայաստանի հայությունը մեծապես տուժեց անգամ քրիստոնյա պետությունների կողմից: Արևելավրացական թագավոր Հերակլ Բ-ն իր 1779 թ. արշավանքի ժամանակ Վրաստան բռնագաղթեցրեց Արարատյան երկրի ութ գյուղերի՝ Հարանիսի, Բյուրի, Ալեթլուի, Էվջիլարի, Քյալակարիսի, Շահրիարի, Գուրդոդլուրի և Աշտարակի բնակիչներին, որոնց բնակեցրեց Գորիում, Հավլաբարում և Սոնախում⁶⁵: Չնայած բռնագաղթվածների մի փոքր մասին Հերակլ Բ-ն ետ վերադարձրեց, սակայն հաշվի առնելով Արարատյան գյուղերի բազմամարդությունը, բռնագաղթեցվեց ավելի քան 2000 ընտանիք, հետևաբար բռնագաղթեցվածների թիվն անցնում էր 10 հազարից:

Արևելյան Հայաստանի բնակչությունը ծանր հարված ստացավ ռուս-պարսկական 1804-1813 թթ. պատերազմի ժամանակ: 1804 թ. ազգությանը վրացի ռուսական զեներալ Յիցիանովը Երևանի անհաջող զորհից հետո իր հետ Թիֆլիս տարավ 2000 հայ, որոնց հաստատեց Հավլաբարում⁶⁶: Դժվար չէ տեսնել, որ հայ բնակչությունը մեծապես տուժում էր ոչ միայն մահմեդական իշխանություններից, այլև քրիստոնյա պետություններից:

Իսկ ի՞նչ էթնիկական պատկեր էին ներկայացնում Երևանի և Նախիջևանի խանությունները մինչև Ռուսական կայսրությանը միացվելը: Պարզվում է, որ դրանց բնակչության ընդհանուր թիվը կազմել է 169 155 մարդ, որից հայեր՝ 57 305 մարդ կամ 33,8 տոկոսը, մահմեդականներ՝ 84 089 կամ 49, 7 տոկոսը, քրդեր՝ 26 911 կամ 16 տոկոսը և այլ ժողովուրդներ՝ 850 կամ 0,5 տոկոսը⁶⁷: Եթե անգամ բոլորովին

65 Տե՛ս Յիշատակարան ազգային արդեան պատմության համար, «Կռունկ Յայոց աշխարհին», 1802, թիվ 4, էջ 280: Գ. Нокодзе, Ираклий Великий, Тбилиси, 1988, с. 104.

66 Տե՛ս Ի. Шопен. Исторический памятник состояния Армянской области в эпоху ее присоединения к Российской империи. СПб. 1852.

67 Տե՛ս Վ. Պարսամյան, Յայ ժողովրդի պատմություն, հատ. Գ, Եր., 1967, էջ 116:

չանդրադառնանք հայերի XVII դարի սկզբի կորուստներին, ապա ստացվում է, որ ժողովրդագրական պատկերը բոլորովին այլ կլիներ, եթե XVIII դարի վերջին և XIX դարի սկզբին հիշյալ բռնագաղթերը տեղի չունենային: Հերակլի կողմից դեպի Վրաստան բռնագաղթվածների թիվը 1828 թ. կազմելու էր ավելի քան 22 000, իսկ Ցիցիանովի միջոցով բռնագաղթվածներինը՝ շուրջ 3000, այլ խոսքով՝ այդ երկու խանութայիններում հայերը կկազմեին ոչ թե 57 305, այլ 82 305 մարդ կամ ընդհանուր բնակչության շուրջ 43 տոկոսը, իսկ մահմեդականներին թիվը կլիներ նույնպես շուրջ 43 տոկոս: Այսինքն՝ այս բոլոր արհավիրքներից հետո անգամ հայ բնակչությունը գործնականում հավասար էր մահմեդական բնակչությանը:

Աղբբեջանական պատմագիտության կողմից շատ է խոսվում պարսկահայերի 1828 թվականի ներգաղթի մասին դեպի Արևելյան Հայաստանի ռուսական տիրույթներ: Եթե XVII դարում Շահ Աբբասը բռնագաղթեցրել է 330 հազարից մինչև 500 հազար հայերի, ապա՝ չհաշվելով անգամ նրանց հնարավոր աճը մինչև 1828 թվականը, 1828 թվին ներգաղթել են շուրջ 40-45 հազար հայեր, որոնց գերակշիռ մասը Արևելյան Հայաստանի՝ Պարսկաստանին մնացած բաժնից էին⁶⁸: Եթե անգամ հաշվի չառնենք այն իրողությունը, որ բուն պարսկական երկրամասերից այդ թվի անգամ կեսը չէր գաղթել, ապա գաղթողների մեծամասնությունը Արևելյան Հայաստանի պարսկական մասից տեղափոխվել է Արևելյան Հայաստանի ռուսական տիրույթներ:

5. Իսկ Ղարաբաղի մասին հարկ է մոռանալ

Սակայն Ռ. Մեթիևի հիմնական թիրախը շարունակում է մնալ հայկական Ղարաբաղը: Հեղինակին խիստ զայրացրել է, որ ՀՀ նախագահ Սերժ Սարգսյանը մահմեդական բնակչությանը համարել է քոչվոր, իսկ հայերին՝ արմատական, բուն բնակչություն: Հեղինակի կարծիքով, իբր՝ մահմեդական բնակչությունը, ըստ շատ հեղինակների, գերակշռել է հայկականին մինչև պարսկահայերի ներգաղթը: Թե ինչքանով են մահմեդականները գերակշռել հայերին, մենք դրան կանդրադառնանք, սակայն իզուր է Ռ. Մեթիևը տաքանում, երբ հայտնի է, որ մահմեդական ամառանոցները, որոնք ժամանակավոր կայաններ էին, վերածվեցին մշտական բնակավայրերի միայն ցարական իշխանությունների նպատակադիր քաղաքականության հետևանքով: Կամ ի՞նչ է, Ռ. Մեթիևը չգիտի⁶⁹, որ Լեռնային Ղարաբաղի հարցի առնչությամբ անընդհատ, մանավանդ՝ 1905-1906 թթ. ընդհարումների շրջանում արժարժվել է մահմեդականների քոչի խնդիրը, որ **իր ժողովրդին հոգեհարազատ «քոչվոր» բառն այդքան զայրացնում է հեղինակին**:

Չցանկանալով մտնել պատմության խորքերը՝ նշենք, որ հայերը XVIII դ. սկզբին կազմում էին Լեռնային Ղարաբաղի բնակչության առավել քան գերակշիռ մասը: Լեռնային Ղարաբաղի հոգևոր առաջնորդների ու մելիքների՝ Եկատերինա Ա-ին 1725 թ. հղված նամակում նշվում է, որ Ղարաբաղի վեց մահալներից յուրաքանչյուրում հաշվվում է 36-50 գյուղ և ամեն մի գյուղում 600, 500, 400, 200, 100 և 50 տնտեսություն⁶⁹: Դաշտային Ղարաբաղում, անշուշտ, քոչվոր տարրը

68 Տե՛ս անդ, էջ 77:

69 Տե՛ս Армяно-русские отношения в первой половине XVIII в., «Сборник документов», т. II, ч. II, Ереван, 1967, с. 249.

աստիճանաբար ավելանում էր և այդ ցեղերի մեջ առանձնանում էր 24 (Իգիրմի-դյորթ) քրդական ցեղերի միությունը, որի գլուխ կանգնած էր Ջևանշիր ցեղը: Ավելորդ է ասել, որ դրանք քրդական և ոչ թե թյուրքական ցեղեր էին: Քրդական և ոչ թե թյուրքական ցեղերի մի աննշան մասը հայ մելիքների թույլտվությամբ հաստատվում է Լեռնային Ղարաբաղի հայկական մելիքություններում՝ մշտապես կազմելով աննշան փոքրամասնություն: Այդ վիճակն ինչ-որ չափով փոխվեց, երբ Փանահ խանին հաջողվեց իր տիրապետությունը հաստատել հայկական մելիքությունների վրա: Նա իր իշխանությունն ամրապնդելու համար Վրաց թագավորությունից և հարևան խանություններից մի շարք ցեղեր տեղափոխեց Ղարաբաղ, որոնցից էին կարաչորլու, փուսիան, ջինլի, դեմուրչի-հասանլի, կենգերլու, քյոթանլի և այլ ցեղեր: Միայն Ղազախից Ահմեդ աղան Ղարաբաղ է տեղափոխում իր 1500 ընտանիք ցեղակիցներին⁷⁰:

Փանահի հաջորդ Իբրահիմ խանի օրոք նոր թափ ստացավ թյուրքալեզու էթնիկ խմբերի ներթափանցումը լեռնային շրջաններ, իսկ Դաշտային Ղարաբաղն աստիճանաբար հայաթափվում էր, հայ բնակչության մի մասը՝ բռնի մահմեդականացվում: Այդ իրողությունը լավ է բնութագրել գերմանացի հետազոտող Ա. Հաքստհաուզենը: Նրա խոսքերով, XVIII դ. սկսած այդ գեղեցիկ երկիրը, այսինքն՝ Ղարաբաղը կրում է խոր անկման հետքեր: Գերի տարված հայերի փոխարեն այստեղ են բերվել ծույլ թաթարներ ու թյուրքեր, որոնք աստիճանաբար լիովին առավելություն են ստանում տեղաբնիկ հայերի նկատմամբ⁷¹: Այդ իրողությունն էր, որ ստիպում էր հայերին խնդրագրով դիմելու Ռուսական կայսրությանը: Ղարաբաղի հայությունը նշանակալից կորուստներ ունեցավ Աղա-Մահմեդ խանի 1795 թ. արշավանքի ժամանակ: Բազմաթիվ կանայք և աղջիկներ բռնաբարվեցին, մեծ թվով տղամարդիկ կոտորվեցին, իսկ անասուններն ու գույքը քշեցին, տարան: Փրկվածներն ապաստանեցին երկրամասի լեռներում ու անտառներում⁷²: Աղա-Մահմեդ խանի 1797 թ. արշավանքից հետո Ղարաբաղում սով բռնկվեց, ժողովուրդն անասելի գրկանքներ կրեց և մի մասով գաղթեց Վրաստան, մյուս մասով՝ Շամախու կողմերը, Ռուսաստան, Օսմանյան կայսրություն և անգամ՝ Պարսկաստանի խորքերը: Մովին հաջորդեց ժանտախտը, որին զոհ գնացին մեծ թվով հայեր, սակայն բնակչության մեծ մասը համառոտ են կառչել էր իր հայրենի հողին⁷³: Մելիք Մեջլումի և Աբովի՝ Եկատերինա Բ-ին ուղարկած նամակից իմանում ենք, որ հայ մելիքների հպատակներն էին 12 հազար հայ ընտանիք կամ շուրջ 70 000 մարդ⁷⁴: Իսկ երբ 1797 թ. հոկտեմբերի 7-ին Պավել կայսրը Ղարաբաղի մելիքներին իրենց հարազատների հետ ռուսական հպատակություն տվեց, Ղարաբաղի շատ հայեր տեղափոխվեցին դեպի Ղազախ և Վրաց թագավորության այլ շրջաններ, Շաքի և Շիրվան⁷⁵: Հիշյալ արտագաղթերի և թյուրքական բռնանշումների հետևանքով Լեռնային Ղարաբաղից արտագաղթեցին շուրջ 11 հազար ընտանիք: Այս բոլորով

70 Տե՛ս Սիրգա-Յուսուֆ Ներսեսով, Ճշմարտացի պատմություն, Եր., 2000, էջ 46-96: Армяно-русские отношения в XVIII веке, 1760-1800 гг., «Сборник документов», т. IV, Ереван, 1990, с. 354. Н. Жуковская, Судьба кочевой культуры, Москва, 1990, с. 54.

71 Տե՛ս А. Гакстгаузен, Закавказский край, СПб, 1857, ч. I, с. 208, 213.

72 Տե՛ս Обзор Елисаветпольской губернии за 1908 г., Елисаветполь, 1909, с. 3.

73 Տե՛ս Армяно-русские отношения в XVIII веке, 1760-1800 гг., «Сборник документов», т. IV, с. 373-375, 378, 459-461.

74 Տե՛ս անդ., էջ 315:

75 Տե՛ս անդ., էջ 465, 505-507, 527, 533-535.

հանդերձ՝ 1805 թ. Ղարաբաղում կային մոտավորապես 10 հազար, իսկ 1808 թ. մարտական գործողություններից հետո՝ 7,5 հազար ընտանիք հայեր: Ղարաբաղի հայությունը ծանր հարված ստացավ 1812 թ., երբ 2200 մարդ գերի տարվեց, իսկ 2000-ը փախուստի դիմեց: Ուստի՝ հայ բնակչության թիվը պատերազմից հետո կազմեց ընդամենը 5 հազար ընտանիք⁷⁶: Հետաքրքիրն այն է, որ երբ Ղարաբաղը կցվեց Ռուսական կայսրությանը, բազմաթիվ ղարաբաղցի հայեր փորձեցին վերադառնալ Ղարաբաղ, սակայն ցարական իշխանություններն ամեն կերպ արգելեցին այդ:

1823 թ. Մոզիլսկու և գնդապետ Երմոլով Բ-ի կողմից իրականացրած Ղարաբաղի պրովինցիայի բնակչության հաշվառումը կատարվեց հարցումների միջոցով, և իրենք էլ՝ հաշվառումն իրականացնողները, բոլորովին վստահ չէին հաշվառման ճշգրտության մեջ, այլ խոսքով՝ տվյալները բոլորովին հուսալի չէին: Սակայն, եթե ելնենք անգամ այդ տվյալներից, ապա ինչպես ճիշտ եզրակացրել է Հ. Սարգսյանը, Լեռնային Ղարաբաղի տարածքում բնակչությունը կազմել է 36 500 մարդ, որից հայ՝ 84,6 տոկոսը, թյուրքալեզու մահմեդականներ՝ 14,7 տոկոսը և քրդեր՝ 0,7 տոկոսը: Գյուղական բնակչության 97,5 տոկոսը հայեր էին: Համեմատության համար նշենք, որ Ղարաբաղի պրովինցիայում 1823 թ. եղել է 17 520 ընտանիք, որոնց 30 տոկոսը հայկական էին, 22 տոկոսը՝ թուրքական և 2 տոկոսը՝ քրդական: Մահմեդական բնակչության 46 տոկոսը՝ գլխավորապես Դաշտային Ղարաբաղի բնակիչներ, քոչվորական կյանք էին վարում⁷⁷:

Քոչվորներին հանելու դեպքում Լեռնային Ղարաբաղի տարածքում ունենք ընտանիքների 54 տոկոսը: Հետևաբար՝ լեռնային հատվածում հայ բնակչությունը կազմում էր ավելի քան 55 տոկոս, թյուրքախոս թաթարները՝ 36,6 տոկոս, իսկ քրդերը՝ 3,7 տոկոսից մի փոքր ավելի:

1897 թ. համառոտաստանյան առաջին մարդահամարի համաձայն՝ Լեռնային Ղարաբաղում ապրում էր 128,6 հազար մարդ, որի 82,7 տոկոսը կամ 106,4 հազարը հայեր էին, 15,9 տոկոսը կամ 20,4 հազարը՝ թաթարներ, 1,5 հազարը՝ ռուսներ և 300-ը՝ այլ ազգերի ներկայացուցիչներ: Շուշիի բնակչության 55,8 տոկոսը հայեր էին⁷⁸:

Մենք բոլորովին միտք չունենք հերքելու, որ Պարսկաստանից գաղթածները հաստատվել են նաև Լեռնային Ղարաբաղում:

Ասենք թե 1992-ին ցեղասպանության ենթարկված Մարաղայի հայ բնակիչների գաղթելու 160-ամյակին նվիրված հուշարձան կա, հետո ի՞նչ: Եթե շատ եք կամենում, պարո՛ն Ռ. Մեհթիև, կարող ենք նշել այն բնակավայրերը, որոնց թյուրքալեզու բնակչությանը Ղարաբաղ էին բերել Ադրբեյջանի իշխանությունները: Նրանք պարզապես ժամանակ չունեցան իրենց գաղթը վավերացնող հուշարձաններ կանգնեցնելու: Ահա սա է իրական պատկերը, պարո՛ն Մեհթիև, և փաստերն անտեսելու կարիք անգամ չկա:

76 Տե՛ս Акты собранные Кавказской Археографической комиссией, Тифлис, 1873, т. V, ч. II, с. 579.

77 Տե՛ս Камеральное описание Карабахской провинции, составленное в 1823 году по распоряжению главноуправляющего в Грузии Ермолова, действительным статским советником Могилевским и полковником Ермоловым II, Тифлис, 1866.

78 Տե՛ս Исторический архив России, фонд 1990, опись 11, дело 636.638 695, Елисаветпольская губерния, Первая всеобщая перепись населения Российской империи, 1897 г., Елисаветпольская губерния, книга 63, СПб, 1904.

Ղարաբաղի խանութիւնը բոլորովին էլ աղբրեջանական⁷⁹ չէր, այլ պարսկական, իսկ Կուրակ-չայի 1805 թ. պայմանագիրը թէն կնքված էր Իբրահիմ խանի և ռուսական իշխանութիւնների կողմից, միջազգային իրավունքի տեսակետից գրոշի արժեք չունէր: Ղարաբաղի խանը, դավաճանելով Պարսկաստանին, պայմանագիր էր կնքել Ռուսական կայսրության հետ: Իրենք՝ ռուսներն էլ մեծ նշանակություն չէին տալիս այդ պայմանագրին, որովհետև Ղարաբաղի անցումը կայսրությանը իրավական առումով վավերացվեց միայն 1813 թ. Գյուլիստանի պայմանագրով: Կուրակ-չայի պայմանագրով ռուսական ցարիզմը պարզապէս տակտիկական քայլ էր կատարել՝ շատ լավ հասկանալով, որ այն չի ճանաչվելու և ոչ մի պետության, առաջին հերթին՝ Պարսկաստանի կողմից:

Անցնելով 20-րդ դարի իրադարձություններին, Ռ. Մեհթիւնը հատկապէս ուրախանում է այն պատճառով, որ 1921-ին Կավբյուրոյի նիստում հայերը (օրինակ՝ Ա. Մ. Նազարեթյանը) քվեարկել են, որ Ղարաբաղը մնա Աղբրեջանի կազմում: Եվ որ Ղարաբաղի հայության առաջնորդները (օրինակ՝ Սերո Մանուցյանը) ողջունել են այդ որոշումը, որն իբր՝ հայ գյուղացիության կողմից ընդունվել է կատարյալ համերաշխությամբ⁸⁰: Անշուշտ, լավ է, որ Ռ. Մեհթիւնը հիշում է Կավբյուրոյի 1921 թ. հուլիսի 5-ի որոշումը: Բայց նա լավ կաներ՝ վերհիշեր նաև Կավբյուրոյի 1921 թ. հուլիսի 4-ի նիստը, որը որոշում կայացրեց Լեռնային Ղարաբաղը թողնել Հայաստանի կազմում: Ճիշտ է՝ այդ որոշմանը Ա. Նազարեթյանը դեմ է քվեարկել, սակայն Ալ. Մյասնիկյանը (Մյասնիկով) քվեարկել է կողմ: Այնպէս որ բոլոր հայերը չեն, որ քվեարկել են Լեռնային Ղարաբաղն Աղբրեջանի կազմում թողնելու օգտին: Հետո չմոռանանք, որ հուլիսի 4-ին Օրջոնիկիձեն էլ քվեարկեց Լեռնային Ղարաբաղը Հայաստանի ԽՍՀ մաս ճանաչելու օգտին, իսկ հաջորդ օրը նա անմիջապէս անցավ հակառակ տեսակետն ունեցողների բանակը, հենց որ Մոսկվայից թելադրվեց հակառակ լուծումը:

Խոստովանում են, որ հայ բոլշևիկների մեծ մասը, այդ թվում և Ա.Մ. Նազարեթյանը, ազգային գիտակցությունը կորցրած մարդիկ էին, որոնց համար Մոսկվայի խոսքն օրենք էր: Սակայն կարծում են, որ այդ հարցում աղբրեջանցիներն էլ առանձնապէս շատ պարծենալու տեղ չունեն: Այսօր աղբրեջանական պատմաբանները աջ ու ձախ հայիտում են Բաքվի Կոմունան և նրա առաջնորդ, ազգությամբ հայ Ստեփան Շահումյանին, բայց իրենց հարց չեն տալիս, որ նրա կոմիսարներից Մաշադի Ազիզբեկովը աղբրեջանցի էր: Կամ՝ արդյո՞ք Նարիմանովը չեղավ Աղբրեջանի Գեմոկրատական Հարապետության գերեզմանափորը: Նշենք, որ բոլշևիկների մեծ մասը, համաշխարհային հեղափոխության գաղափարին կառչած, ո՛չ ազգություն ուներ և ո՛չ էլ հայրենիք: Ցավով, ստիպված են խոստովանել, որ այդ հարցում հայ բոլշևիկներն առաջամարտիկներ էին: Չմոռանանք նաև, որ Հայաստանի Կոմկուսի կենտրոնը Ալ. Մյասնիկյանի գլխավորությամբ մերժել էր Կավբյուրոյի հուլիսի 5-ի որոշումը:

Մի հարցում համաձայն ենք Ռ. Մեհթիւնի հետ, որ ԼՂԻՄ-ը արհեստական կազմավորում էր⁸¹, քանի որ այն բոլոր օրենքներով պետք է մաս կազմեր Հայկական ԽՍՀ-ին: Համաձայն ենք նաև, որ մարզի սահմանները Աղբրեջանի

79 Տե՛ս <http://www.Trend.az>, 29.10.2010, c. 23.

80 Տե՛ս նույն տեղում, էջ 23-24:

81 Տե՛ս նույն տեղում:

կառավարության կողմից անցկացված էին կամայականորեն: Անհասկանալի է, թե ինչու՞ Գյուլիստանի շրջանը, որն ավելի ուշ հայտնի էր Շահումյանի շրջան անունով և միշտ մաս էր կազմել Խամսայի մեկիքությունների միության, դուրս էր թողնվել մարզի սահմաններից: Միանգամայն անհեթեթ էին մարզի սահմաններն արևմուտքում, որտեղ աղբբեջանական իշխանություններն ամեն ինչ արել էին, որ մարզն անմիջական սահման չունենա Հայկական ԽՍՀ-ի հետ: Աղբբեջանական իշխանությունները չէին կամենում, որ մուսուլմանաբնակ որևէ գյուղ հայտնվի ինքնավար մարզի տարածքում, երբ Գյուլիստանից մինչև ՀԽՍՀ-ի Շամշադինի շրջան տասնյակ հայկական գյուղեր հայտնվում էին մարզից դուրս: Մարզի սկզբնական տարածքը եղել է 4160,5 քվմ, հետո այն դարձել է 4431,7 քվմ: Եվ դա համարվում է «բարյացակամության» մեծ նշան, սակայն ոչինչ չի սավում, որ Աղբբեջանի իշխանությունների կողմից աստիճանաբար մեծացվում էր աղբբեջանական բնակչության տոկոսը և այնուհետև մարզից հանվում էին տարածքներ և՛ հյուսիսում, և՛ հարավում, որոնք մտցվում էին հարևան շրջանների տարածքների մեջ:

Ռ. Մեհթիևը խոսում է ԼՂԻՄ-ին միացված ինչ-ինչ հողերի մասին՝ մոռանալով, որ Անդրֆեդերացիայի օժանդակությամբ Աղբբեջանը տիրացել է Հայկական ԽՍՀ-ի տարածքներին Ալլահ-Գյուլերի (իմա՛ Ալ-Բ.Հ.) լճերի շրջանում, Միսիանի սահմանակցությամբ և այլ հատվածներում: Հեղինակը շատ է ոգևորվում և հայտարարում է, թե Աղբբեջանի կողմից 150 հազար դեսյատին հողեր են «նվիրվել» Հայկական ԽՍՀ-ին՝ Չանգեզուրի, Չևանշիրի և Ղազախի գավառների տարածքում՝ 1923 թվին, 1929 թվին՝ Չանգեզուրի գավառի հատվածում Նյուվադիի շրջանը և մի քանի այլ գյուղեր⁸²:

Եվ ինչպե՞ս է, որ Չանգեզուրը հռչակվում է Աղբբեջանի «պատմական տարածք», երբ անգամ Խորհրդային Ռուսաստանն այն մշտապես ճանաչել է Հայկական ԽՍՀ-ի անկապտելի մաս, այն դեպքում, երբ տարածքային հարցերում միշտ աղբբեջանամետ է եղել: Հայաստանի Հանրապետության կառավարությունը 1919 թ. Փարիզի խաղաղության կոնֆերանս է ներկայացրել Արևելյան Հայաստանի տարածքը և սահմանները՝ գերակշիռ հայ բնակչությամբ, իսկ Աղբբեջանի ԽՍՀ-ն մոսկովյան իշխանությունների աջակցությամբ տիրացել է այդ տարածքի մեկ երրորդին, - սա է ճշմարտությունը:

Ռ. Մեհթիև, լավ կանեք հրաժարվեք այն հեքիաթից, թե իբր՝ Սումգայիթի ջարդի ժամանակ հայերը մասնակցել են կոտորածներին⁸³: Աղբբեջանում կային (այժմ չգիտեմ՝ կա՞ն, թե՛ ոչ-Բ.Հ.) բազմաթիվ ուղիներ, որոնք կրում էին հայկական ազգանուններ: Թերևս դրանցից մեկին հավաքագրել են աղբբեջանական հատուկ ծառայությունները: Խորապես ցավում են երկրաշարժից հետո ժամանած աղբբեջանական փրկարարների ինքնաթիռի կործանման համար, որի մեղքը բնության վրա է, բայց չեմ կարող չիշել, թե ինչպես այդ օրերին թույլ չէին տրվում Հայկական ԽՍՀ ժամանել հումանիտար օգնություն պարունակող էշելոնները և կամ էլ Աղբբեջանում ինչպե՞ս էր փչացվում աշխարհի առաքած օգնությունը:

Շարունակելով իրականությունը գլխի վրա շրջելու իր գործելակերպը, «ԼՂԻՄ-ը Աղբբեջանից դուրս բերելու⁸⁴» հայության փորձերը Ռ. Մեհթիևը հա-

82 Տե՛ս նույն տեղում, էջ 26:

83 Տե՛ս նույն տեղում, էջ 27:

84 Տե՛ս նույն տեղում:

մարում է միակողմանի և հակառակ ԽՍՀՄ սահմանադրությանը: Իսկ ու՞ր է այսօր ԽՍՀՄ-ը, որի սահմանադրությամբ միութենական հանրապետությունները այնքանով էին իրավասու դուրս գալու ԽՍՀՄ կազմից, որքանով նրանց կազմում եղած ինքնավարությունները՝ միութենական հանրապետության կազմից, ինչը և տեղի է ունեցել: Իսկ դրանից հետո Ադրբեջանի իշխանությունները, պատերազմ սկսելով Ղարաբաղի դեմ, կորցրել են անգամ ԽՍՀՄ-ի կամ մյուս երկրների սահմանադրությունները մեջտեղ բերելու իրավունքը:

Թեև անցած զույգ տասնամյակներում Ադրբեջանի ղեկավարությունն ամեն ինչ արել է իր երկրում հակահայկական քարոզչություն ծավալելու համար, բայց հայկական քարոզչությունն իր առջև հակաադրբեջանական քարոզչության խնդիր չի դրել ու չի դնում:

Ավելին, Լեռնային Ղարաբաղի Հանրապետությունը որպես պետություն կայանում է և առնականանում: Եվ թո՞ղ Ռ. Մեխիևը շատ չանհանգստանա մեր անկախության հնարավոր կորստի համար. ո՛չ հայ ժողովուրդը և ո՛չ ՀՀ նախագահը, պարո՞ն Մեխիև, Չեր խորհուրդների կարիքը չեն զգում: Մենք խաղաղասեր ժողովուրդ ենք, սակայն ցանկացած ոտնձգության կարող ենք հավուր պատշաճի պատասխանել: Ուստի մեզ զայրացնել պետք չէ:

Ավելին՝ երբ որևէ պետություն, օրինակի համար՝ Ադրբեջանը, մոռանում է պատմության դասերը և փորձում է ոտնահարել ժամանակավորապես իր գերակայության տակ հայտնված ժողովուրդների իրավունքները, ապա դրանով հենց ինքն է ամրապնդում նրանց ինքնորոշման իրավական հիմքերը: Ու քանի որ Լեռնային Ղարաբաղի հայերը վաղուց արդեն ինքնորոշվել են, պարո՞ն Մեխիև, զգուշացե՛ք պատմությունը կեղծելու և նրա դասերն անտեսելու գործելակերպից, քանի որ նման եղանակով Չեր երկրում սերմանվող այլատյացության մթնոլորտում հերթը կարող է հասնել թալիշների կամ լեզգիների ինքնորոշմանը...

Լեռնային Ղարաբաղը եղել է, կա և կլինի հայկական: Այն գոյություն ունի de-facto, սակայն սարբերի ետևում չէ նաև այն օրը, երբ հայ ժողովրդի երկու հատվածները կմիավորվեն մեկ պետության մեջ:

Summary

A STATE LEVEL RAISED FALSIFICATION

“Goris-2010: the Annual Year of the Absurd Theatre”: the Political Drivel of Razik Mehtiyev, the President Recruitment Manager of Azerbaijan

Babken H. Harutyunyan

The RA president Serj Sargsyan gave a speech in front of the Diaspora correspondents on October 16 of this year, making an appeal to bring the true Press to the attention of the world society. His speech evoked a state of rage in the authority circles of Azerbaijan, and on October 29, R. Mehtiyev, the president recruitment manager of Azerbaijan, came up with an article, not only trying to take under suspicion and to deny the theses of the RA president’s speech, but also the achievements of the Armenian historiographical mind.

In the present article, on the factual material it is being shown that in the person of R. Mehtiyev the Azerbaijani historiography, while examining the Armenian issues, makes falsification and leads a policy of artificially falsifying the simplest issues.

In the article such questions are being examined as the problems of the Azerbaijani being new-comers and formation time questions, the impossibility and drivel of the Caucasian Albans being the ancestors of the Azerbaijani, Strabon's and other authors' deliberate information falsification by R. Mehtiyev, the emergence of the geographical and governmental region name "Azerbaijan" from the Iranian Atur-Patakan, the problem of the Turkish falsifications of the Armenian place-names of the Eastern Armenia caused because of the Muslim bends, Vararakn village's preceding the Khanqyand barracks and residence, the genocide committed by the ancestors of the Azerbaijani, the Ghzlbash tribes, in the Eastern Armenian at the beginning of the XVII century, the emigration of the Armenians forced by the Christian states in the second half of the XVIII century and in the first 30 years of the XIX century, the fact of Nagorno Karabakh being a part of the historical Armenia, the place-name Ejmiatsin having no connection with the "Uch-Muazin" invention, the circumstance of giving Ejmiatsin the name "Uch-qilisa", the real picture of the Persian Armenians after the 1826-1828 Russian-Persian War, the real picture of the Nagorno Karabakh population in the XVIII century and at the beginning of the XIX century, the NKAO demographical problems, the so-called "Genocide of Khojalu", the legitimacy of the Armenians' self-determination of Nagorno Karabakh.